

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

पञ्चमकाण्डे चतुर्थः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Version Notes:

This is now the current Version 2.0 dated May 31, 2025.

1. This replaces the earlier version 1.0 dated Feb 28, 2021.
2. This version has been updated with the errors found and reported till May 15, 2025.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st	Version Number	0.0 dated 31st August 2018
2nd	Version Number	0.0 dated 31st January 2019
3rd	Version Number	0.0 dated 30th September 2019
4th	Version Number	0.1 dated 31st May 2020
5th	Version Number	1.0 dated 28th Feb 2021

Table of Contents

5 कृष्ण यजुर्वेदीय तैत्तिरीय संहितायां

पद पाठे पञ्चमं काण्डं 4

5.4 पञ्चमकाण्डे चतुर्थः प्रश्नः – इष्टकात्रयाभिधानं..... 4

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

5 कृष्ण यजुर्वेदीय तैत्तिरीय संहितायां पद पाठे पञ्चमं काण्डं

5.4 पञ्चमकाण्डे चतुर्थः प्रश्नः – इष्टकात्रयाभिधानं

TS 5.4.1.1

दे॒वा॒सु॒राः सँ॒य॒त्ता आ॒सन् ते न व्य॑जयन्त स ए॒ता इन्द्र॑स्तनू॒रपश्य॑त्
ता उपा॑धत्त ताभि॒र्वै स तनु॑वमिन्द्रि॒यं वी॒र्य॑मात्म॒न्नध॑त्त ततो दे॒वा
अ॒भवन् परा॑ ऽसु॒रा यदिन्द्र॑तनू॒रुप॑दधाति तनु॑वमे॒व ताभि॑रिन्द्रि॒यं वी॒र्यं
य॑जमान आ॒त्मन् ध॑त्ते ऽथो॒ सेन्द्र॑मे॒वाग्नि॑ꣳ सतनुं॑ चिनुते भव॒त्यात्म॑ना
॥ परा॑ऽस्य भ्रातृ॒व्यो – [] 1

TS 5.4.1.1 - Padam

दे॒वा॒सु॒रा इति॑ दे॒व – अ॒सु॒राः । सँ॒य॒त्ता इति॑ सं-य॒त्ताः । आ॒सन् ।
ते । न । वी॒ति । अ॒जय॑न्त । सः । ए॒ताः । इन्द्रः॑ । तनूः॑ ।
अ॒पश्य॑त् । ताः । उपे॑ति । अ॒धत्त । ताभिः॑ । वै । सः । तनु॑वम् ।

इन्द्रि॒यम् । वी॒र्यम् । आ॒त्मन् । अ॒धत्त॑ । ततः॑ । दे॒वाः । अ॒भवन् ।
परे॑ति । अ॒सुराः । यत् । इन्द्र॑तनूरितीन्द्र – तनूः ।
उ॒प॒द॒धा॒तीत्यु॑प – द॒धा॒ति । त॒नु॒वम् । ए॒व । ता॒भिः । इन्द्रि॒यम् ।
वी॒र्यम् । य॒ज॒मा॒नः । आ॒त्मन् । ध॒त्ते । अथो॑ इति । सेन्द्र॑मिति
स – इन्द्र॑म् । ए॒व । अ॒ग्निम् । स॒त॒नु॒मिति॑ स – त॒नुम् । चि॒नु॒ते ।
भ॒व॒ति । आ॒त्म॒ना । प॒रे॒ति । अ॒स्य । भ्रा॒तृ॒व्यः । 1 (50)

TS 5.4.1.2

भ॒व॒ति य॒ज्ञो दे॒वेभ्यो॑ ऽपा॒क्राम॑त् तम॒व॒रु॒धं ना॑श॒क्नु॒वन्त॑ ए॒ता
य॒ज्ञ॒त॒नूर॑पश्यन् ता उ॒पा॒द॒धत॑ ता॒भिर्वै॑ ते य॒ज्ञ॒म॒वा॒रु॒न्धत॑ यद्-
य॒ज्ञ॒त॒नूरु॑प॒द॒धा॒ति य॒ज्ञ॒मे॒व ता॒भिर्य॑ज॒मा॒नोऽव॑ रु॒न्धे
त्रय॑स्त्रि॒ंश॒तमु॑प द॒धा॒ति त्रय॑स्त्रि॒ंश॒द्-वै दे॒वता॑ दे॒वता॑ ए॒वाव॑ रु॒न्धे
ऽथो॑ सा॒त्मा॒न॒मे॒वा॒ग्निं स॑त॒नुं चि॒नु॒ते सा॒त्माऽमु॑ष्मिन् लो॒के – [] 2

TS 5.4.1.2 - Padam

भ॒व॒ति । य॒ज्ञः । दे॒वेभ्यः॑ । अ॒पे॒ति । अ॒क्राम॑त् । तम् ।
अ॒व॒रु॒ध॒मि॒त्य॒व – रु॒धम् । न । अ॒श॒क्नु॒वन् । ते । ए॒ताः ।

य॒ज्ञ॒त॒नू॒रिति॑ य॒ज्ञ – त॒नूः । अ॒प॒श्य॒न् । ताः । उ॒पेति॑ । अ॒द॒ध॒त ।
ता॒भिः । वै । ते । य॒ज्ञ॒म् । अ॒वेति॑ । अ॒रु॒न्ध॒त । यत् । य॒ज्ञ॒त॒नू॒रिति॑
य॒ज्ञ – त॒नूः । उ॒प॒द॒धा॒तीत्यु॑प – द॒धा॒ति । य॒ज्ञ॒म् । ए॒व । ता॒भिः ।
य॒ज॒मा॒नः । अ॒वेति॑ । रु॒न्धे । त्र॒य॒स्त्रिं॑श॒तमि॒ति त्र॒यः – त्रिं॑श॒तम् ।
उ॒पेति॑ । द॒धा॒ति । त्र॒य॒स्त्रिं॑श॒दिति॑ त्र॒यः – त्रिं॑श॒त् । वै । दे॒व॒ताः ।
दे॒व॒ताः । ए॒व । अ॒वेति॑ । रु॒न्धे । अथो॒ इति॑ । सा॒त्मा॒नमि॒ति
स – आ॒त्मा॒नम् । ए॒व । अ॒ग्नि॒म् । स॒त॒नु॒मि॒ति स॒त॒नु॒म् । चि॒नु॒ते ।
सा॒त्मेति॑ स – आ॒त्मा । अ॒मुष्मि॑न् । लो॒के । 2 (50)

TS 5.4.1.3

भ॒व॒ति॒ य ए॒वं वै॒द ज्यो॑ति॒ष्म॒तीरु॑प द॒धा॒ति ज्यो॑ति॒रे॒वास्मि॑न्
द॒धा॒त्ये॒ताभि॑र्वा अ॒ग्नि॒श्चितो॑ ज्व॒ल॒ति ता॒भिरे॒वैनं॑ स॒मि॒न्ध उ॒भयो॑र॒स्मै
लो॒कयो॒ज्यो॑ति॒र्भव॑ति नक्ष॒त्रेष्ट॒का उप॑ द॒धा॒त्ये॒तानि॑ वै दि॒वो ज्यो॑ती॒ष्णि
ता॒न्ये॒वाव रु॒न्धे सु॒कृ॒तां वा॑ ए॒तानि॑ ज्यो॑ती॒ष्णि य॒न्नक्ष॑त्राणि
ता॒न्ये॒वाऽऽ*प्नो॑त्यथो॒ अनू॑का॒शमे॒वैतानि॑ – [] 3

TS 5.4.1.3 - Padam

भवति॑ । यः॑ । ए॒वम् । वे॒द । ज्योति॑ष्मतीः । उपेति॑ । द॒धाति॑ ।
ज्योतिः॑ । ए॒व । अ॒स्मिन् । द॒धाति॑ । ए॒ताभिः॑ । वै । अ॒ग्निः ।
चि॒तः । ज्व॒लति॑ । ताभिः॑ । ए॒व । ए॒नम् । स॒मिति॑ । इ॒न्धे । उ॒भयोः॑ ।
अ॒स्मै । लो॒कयोः॑ । ज्योतिः॑ । भ॒वति॑ । नक्ष॑त्रेष्टका इति
नक्ष॑त्र – इ॒ष्टकाः । उपेति॑ । द॒धाति॑ । ए॒तानि॑ । वै । दि॒वः ।
ज्योती॑ष्णि । तानि॑ । ए॒व । अ॒वेति॑ । रु॒न्धे । सु॒कृता॒मिति॑
सु – कृ॒ताम् । वै । ए॒तानि॑ । ज्योती॑ष्णि । यत् । नक्ष॑त्राणि । तानि॑ ।
ए॒व । आ॒प्नोति॑ । अथो॒ इति॑ । अ॒नूका॒शमित्य॑नु – का॒शम् । ए॒व ।
ए॒तानि॑ । 3 (50)

TS 5.4.1.4

ज्योती॑ष्णि कुरु॒ते सु॒वर्ग॑स्य लो॒कस्यानु॑ख्यात्यै यथ् स॒स्पृष्टा॑
उप॒द॒ध्याद्-वृ॒ष्ट्यै लो॒कमपि॑ द॒ध्याद॑वर्षु॒कः पर्जन्यः॑
स्याद॑स॒स्पृष्टा॑ उप॒ दधाति॑ वृ॒ष्ट्या ए॒व लो॒कं करोति॑ वर्षु॒कः

प॒र्जन्यो॑ भवति॑ पु॒रस्ता॑दन्याः प्र॒तीची॑रुप॑ दधाति॑ पश्चा॑दन्याः
प्रा॒चीस्तस्मा॑त् प्रा॒चीना॑नि च प्र॒तीची॑नानि च नक्ष॑त्राण्या॑ वर्तन्ते ॥ 4

TS 5.4.1.4 - Padam

ज्योती॑षि । कु॒रुते॑ । सु॒वर्ग॑स्येति॑ सुवः॑ – ग॒स्य । लो॒कस्य॑ ।
अनु॑ख्यात्या॒ इत्यनु॑ – ख्या॒त्यै । यत् । स॒स्पृष्टा॑ इति॒ सं – स्पृष्टाः॑ ।
उप॒दद्ध्या॑दित्युप॑-दद्ध्यात् । वृ॒ष्ट्यै॑ । लो॒कम् । अपी॑ति । दद्ध्यात् ।
अव॑र्षुकः । प॒र्जन्यः॑ । स्यात् । अस॑स्पृष्टा॒ इत्यसं॑ – स्पृष्टाः॑ ।
उपे॑ति । द॒धाति॑ । वृ॒ष्ट्यै॑ । ए॒व । लो॒कम् । क॒रोति॑ । व॑र्षुकः ।
प॒र्जन्यः॑ । भवति॑ । पु॒रस्ता॑त् । अ॒न्याः । प्र॒तीचीः॑ । उपे॑ति । द॒धाति॑ ।
पश्चा॑त् । अ॒न्याः । प्रा॒चीः । तस्मा॑त् । प्रा॒चीना॑नि । च । प्र॒तीची॑नानि ।
च । नक्ष॑त्राणि । ए॒ति । वर्त॑न्ते ॥ 4 (41)

(भ्रातृ॑व्यो – लो॒क – ए॒वैतान्ये॑ – क॒चत्वारि॑ंशच्च) (A1)

TS 5.4.2.1

ऋ॒तव्या॑ उप॑ दधात्यृ॒तूनां॑ क्लृ॒प्त्यै॑ द्व॒न्द्वमु॑प॑ दधाति॒ तस्मा॑द् द्व॒न्द्वमृ॑तवो
ऽधृ॑तेव॒ वा ए॒षा यन्म॑द्ध्य॒मा चि॑तिर॒न्तरि॑क्षमिव॒ वा ए॒षा द्व॒न्द्वम॒न्यासु॑

चि॒ती॒षू॒प॒ द॒धा॒ति॒ च॒त॒स्रो॒ म॒द्ध्ये॒ धृ॒त्या॒ अ॒न्त॒श्श॒ले॒ष॒णं॒ वा॒
ए॒ता॒श्चि॒ती॒नां॒ य॒दृ॒त॒व्या॒ य॒दृ॒त॒व्या॒ उ॒प॒द॒धा॒ति॒ चि॒ती॒नां॒ वि॒धृ॒त्या॒
अ॒व॒का॒म॒नू॒प॒ द॒धा॒त्ये॒षा॒ वा॒ अ॒ग्ने॒र्यो॒निः॒ स॒यो॒नि॒ – [] 5

TS 5.4.2.1 - Padam

ऋ॒त॒व्याः॑ । उ॒पे॒ति॑ । द॒धा॒ति॑ । ऋ॒तू॒नाम् । क्लृ॒प्त्यै॑ । द्व॒न्द्व॒मि॒ति॑ द्वं-द्वम् ।
उ॒पे॒ति॑ । द॒धा॒ति॑ । तस्मा॑त् । द्व॒न्द्व॒मि॒ति॑ द्वं – द्वम् । ऋ॒त॒वः॑ । अधृ॒ता ।
इ॒व । वै । ए॒षा । यत् । म॒द्ध्य॒मा । चि॒तिः॑ । अ॒न्त॒रि॒क्षम् । इ॒व । वै ।
ए॒षा । द्व॒न्द्व॒मि॒ति॑ द्वं – द्वम् । अ॒न्या॒सु । चि॒ती॒षु । उ॒पे॒ति॑ । द॒धा॒ति॑ ।
च॒त॒स्रः॑ । म॒द्ध्ये॑ । धृ॒त्यै॑ । अ॒न्त॒श्श॒ले॒ष॒ण॒मि॒त्य॒न्तः॑ – श॒ले॒ष॒णम् ।
वै । ए॒ताः॑ । चि॒ती॒नाम् । यत् । ऋ॒त॒व्याः॑ । यत् । ऋ॒त॒व्याः॑ ।
उ॒प॒द॒धा॒ती॒त्यु॒प॒ – द॒धा॒ति॑ । चि॒ती॒नाम् । वि॒धृ॒त्या॒ इति॑ वि – धृ॒त्यै॑ ।
अ॒व॒का॒म् । अ॒नु । उ॒पे॒ति॑ । द॒धा॒ति॑ । ए॒षा । वै । अ॒ग्नेः॑ । यो॒निः॑ ।
स॒यो॒नि॒मि॒ति॑ स – यो॒निम् । 5 (50)

TS 5.4.2.2

–मे॒वाग्निं॑ चि॒नुत॑ उ॒वाच॑ ह वि॒श्वामि॒त्रो ऽद॒दि॒त् स ब्र॒ह्मणा॑ ऽन्नं॑
यस्यै॒ता उप॑धी॒यान्तै॑ य उ॒ चैना॑ ए॒वं वे॒ददि॒ति सँव॑त्सरो वा ए॒तं
प्रति॑ष्ठा॒यै नु॒दते॑ यो॑ ऽग्निं चि॒त्वा न प्रति॑तिष्ठति पञ्च॑ पूर्वा॒श्रितयो॑
भव॑न्त्यथ॒ षष्ठीं॑ चि॒तिं चि॒नुते॑ षड् वा ऋ॒तवः॑ सँव॑त्सर ऋ॒तुष्वे॒व
सँव॑त्सरे प्रति॑तिष्ठत्ये॒ ता वा– [] 6

TS 5.4.2.2 - Padam

ए॒व । अ॒ग्निम् । चि॒नुते॑ । उ॒वाच॑ । ह । वि॒श्वामि॒त्र इति॑ वि॒श्व–मि॒त्रः ।
अ॒दत् । इ॒त् । सः । ब्र॒ह्मणा॑ । अ॒न्नम् । य॒स्य । ए॒ताः । उप॑धी॒यान्ता
इत्यु॑प – धी॒यान्तै॑ । यः । उ॒ । च॒ । ए॒नाः । ए॒वम् । वे॒दत् । इति॑ ।
सँव॑त्सर इति॑ सं – व॒त्सरः॑ । वै । ए॒तम् । प्रति॑ष्ठा॒या इति॑
प्रति॑ – स्था॒यै । नु॒दते॑ । यः । अ॒ग्निम् । चि॒त्वा । न । प्रति॑तिष्ठतीति॑
प्रति॑ – तिष्ठति॑ । पञ्च॑ । पूर्वाः॑ । चि॒तयः॑ । भव॑न्ति । अथ॑ । षष्ठी॑म् ।
चि॒तिम् । चि॒नुते॑ । षट् । वै । ऋ॒तवः॑ । सँव॑त्सर इति॑ सं–व॒त्सरः॑ ।

ऋ॒तुषु॑ । ए॒व । सँ॒व॒त्स॒र इति॑ सं – व॒त्स॒रे । प्र॒तीति॑ ।

ति॒ष्ठति॑ । ए॒ताः । वै । 6 (50)

TS 5.4.2.3

अधि॑प॒त्नीर्ना॑मि॒ष्टका॑ य॒स्यैता॑ उप॒धी॒यन्तेऽधि॑प॒तिरे॒व स॑मा॒नानां॑ भव॒ति
यं द्वि॒ष्यात् तमु॑प॒दध॑द् ध्या॒येदे॒ताभ्य॑ ए॒वैनं॑ दे॒वता॑भ्य॒ आ वृ॑श्चति
ताज॑गा॒र्तिमा॒र्च्छत्य॑ङ्गि॒रसः॑ सु॒वर्गं॑ लो॒कं य॑न्तो॒ या य॒ज्ञस्य॑
निष्कृ॑ति॒रासी॒त् तामृ॑षि॒भ्यः प्र॒त्यौह॑न् तद्धि॑रण्यम॒भवद्-यद्धि॑रण्यश॒ल्कैः
प्रो॒क्षति॑ य॒ज्ञस्य॑ निष्कृ॑त्या अथो॑ भेष॒जमे॒वास्मै॑ करोत्य – [] 7

TS 5.4.2.3 - Padam

अधि॑प॒त्नीरि॒त्यधि॑ – प॒त्नीः । ना॒म । इ॒ष्टकाः॑ । य॒स्य । ए॒ताः ।
उप॒धी॒यन्त इत्यु॑प – धी॒यन्ते॑ । अधि॑प॒तिरि॒त्यधि॑ – प॒तिः । ए॒व ।
स॒मा॒ना॒नाम् । भव॒ति । यम् । द्वि॒ष्यात् । तम् । उप॒दध॑दित्यु॑प-दध॑त् ।
ध्या॒येत् । ए॒ताभ्यः॑ । ए॒व । ए॒नम् । दे॒वता॑भ्यः । ए॒ति । वृ॑श्चति ।
ताज॑क् । आ॒र्तिम् । ए॒ति । ऋ॒च्छति॑ । अ॒ङ्गि॒रसः॑ ।
सु॒वर्ग॑मि॒ति सु॒वः – गम् । लो॒कम् । य॑न्तः । या । य॒ज्ञस्य॑ ।

निष्कृ॑तिरि॒ति निः-कृ॒तिः । आसी॑त् । ताम् । ऋषि॑भ्य इत्यृषि॑-भ्यः ।
प्रती॑ति । औह॑न् । तत् । हिर॑ण्यम् । अ॒भवत् । यत् ।
हिर॑ण्यश॒ल्कैरि॒ति हिर॑ण्य - श॒ल्कैः । प्रोक्ष॑तीति प्र - उक्ष॑ति ।
यज्ञ॑स्य । निष्कृ॑त्या इति निः - कृ॒त्यै । अथो॑ इति । भेष॑जम् ।
ए॒व । अ॒स्मै । क॒रोति॑ । 7 (50)

TS 5.4.2.4

-थो॑ रू॒पेणै॒वैन॑ꣳ सम॑र्द्धयत्यथो॑ हिर॑ण्यज्योतिषै॒व सु॑वर्गं लो॒कमे॑ति
साह॑स्रव॒ता प्रोक्ष॑ति साह॑स्रः प्र॒जाप॑तिः प्र॒जाप॑तेराप्त्या इ॒मा मे
अ॒ग्न इष्ट॑का धे॒नवः स॒न्त्वित्या॑ह धे॒नूरे॒वैनाः॑ कुरु॒ते ता ए॒नं का॑मदु॒घा
अ॒मुत्रा॑मुष्मिन् लो॒क उप॑ तिष्ठन्ते ॥ 8

TS 5.4.2.4 - Padam

अथो॑ इति । रू॒पेण॑ । ए॒व । ए॒नम् । समि॑ति । अ॒र्द्धय॑ति । अथो॑
इति । हिर॑ण्यज्योतिषेति हिर॑ण्य - ज्यो॒तिषा॑ । ए॒व । सु॒वर्गमि॑ति
सुवः॑ - गम् । लो॒कम् । ए॒ति । साह॑स्रव॒तेति॑ साह॑स्र - व॒ता ।
प्रेति॑ । उक्ष॑ति । साह॑स्रः । प्र॒जाप॑तिरिति प्र॒जा - प॒तिः ।

प्र॒जा॒प॒ते॒रि॒ति॒ प्र॒जा – प॒तेः॑ । आ॒प्त्यै॑ ॥ इ॒माः । मे॒ । अ॒ग्ने॒ । इ॒ष्ट॒काः ।
धे॒न॒वः॑ । स॒न्तु॒ । इति॑ । आ॒ह॒ । धे॒नूः॑ । ए॒व । ए॒नाः॑ । कु॒रु॒ते॑ । ताः ।
ए॒न॒म् । का॒म॒दु॒घा इति॑ का॒म – दु॒घाः॑ ॥ अ॒मु॒त्र॑ । अ॒मु॒ष्मि॒न् । लो॒के॒ ।
उ॒पे॒ति॑ । ति॒ष्ठ॒न्ते॒ ॥ 8 (5.4.8.3)

(स॒र्या॑नि – मे॒ता॒ वै – क॑रोत्ये – का॒न्न॒च॒त्वा॒रि॒ञ्श॒च्च॑) (A2)

TS 5.4.3.1

रु॒द्रो वा ए॒ष य॒द॒ग्निः॑ स ए॒तर्॒हि॒ जा॒तो यर्॒हि॒ सर्व॑श्चि॒तः स॒ यथा॑
व॒थ्सो॑ जा॒तः स्त॒नं प्रे॒प्स॒त्ये॒वं वा॑ ए॒ष ए॒तर्॒हि॒ भा॒ग॒धे॒यं प्रे॒प्स॒ति॒
तस्मै॑ यदाहु॒तिं न जुहु॑याद॒ध्व॒र्युं च॒ यज॑मा॒नं च॒ ध्या॒ये॒च्छ॒त॒रु॒द्री॒यं
जु॒होति॑ भा॒ग॒धे॒ये॒नै॒वैन॑ञ् श॒म॒य॒ति॒ नाऽऽ*ति॒मा॒र्च्छ॒त्य॒ध्व॒र्यु॒र्न
यज॑मा॒नो यद् ग्रा॒म्या॒णां प॒शू॒नां– [] 9

TS 5.4.3.1 - Padam

रु॒द्रः । वै । ए॒षः । यत् । अ॒ग्निः । सः । ए॒तर्॒हि॒ । जा॒तः । यर्॒हि॒ ।
सर्वः॑ । चि॒तः । सः । यथा॑ ॥ व॒थ्सः॑ । जा॒तः । स्त॒नम् ॥
प्रे॒प्स॒तीति॑ प्र – ई॒प्स॒ति॑ । ए॒वम् । वै । ए॒षः । ए॒तर्॒हि॒ ।

भा॒ग॒धे॒य॒मि॒ति॑ भा॒ग॒-धे॒य॒म् । प्रे॒ति॑ । ई॒प्स॒ति॑ । तस्मै॑ । यत् ।
आ॒हु॒ति॒मि॒त्या-हु॒ति॒म् । न । जु॒हु॒यात् । अ॒ध्व॒र्यु॒म् । च॒ । यज॑मानम् ।
च॒ । ध्या॒येत् । श॒त॒रु॒द्री॒य॒मि॒ति॑ श॒त॒ - रु॒द्री॒य॒म् । जु॒हो॒ति॑ ।
भा॒ग॒धे॒ये॒ने॒ति॑ भा॒ग॒ - धे॒ये॒न॑ । ए॒व । ए॒न॒म् । श॒म॒य॒ति॑ । न । आ॒र्ति॑म् ।
ए॒ति॑ । ऋ॒च्छ॒ति॑ । अ॒ध्व॒र्युः॑ । न । यज॑मानः । यत् । ग्रा॒म्या॒णा॒म् ।

प॒शूना॑म् । 9 (50)

TS 5.4.3.2

प॒य॒सा जु॒हु॒याद् ग्रा॒म्यान् प॒शूञ्छु॒चा ऽर्प॑येद्-यदा॑र॒ण्याना॑-मा॒र॒ण्यान्
ज॒र्तिल॑यवा॒ग्वा वा जु॒हु॒याद् ग॒वी॒धु॒क॒य॒वा॒ग्वा वा न॑ ग्रा॒म्यान् प॒शून्.
हि॒न॒स्ति॒ नाऽऽ*र॒ण्यान॑थो ख॒ल्वाहु॑र॒नाहु॑तिर्वै ज॒र्तिला॑श्च
ग॒वी॒धु॒का-श्चे॒त्यज॑क्षी॒रेण॑ जु॒हो॒त्याग्ने॑यी वा ए॒षा यद॑जा ऽहु॒त्यै॒व
जु॒हो॒ति॑ न ग्रा॒म्यान् प॒शून्. हि॒न॒स्ति॒ नाऽऽर॒ण्यान॑ङ्गि॒रसः॑ सु॒वर्गं॑ लो॒कं
य॒न्तो- [] 10

TS 5.4.3.2 - Padam

प॒य॒सा । जु॒हु॒यात् । ग्रा॒म्यान् । प॒शून् । शु॒चा । अ॒र्प॒येत् । यत् ।
आ॒र॒ण्य॒नाम् । आ॒र॒ण्य॒ान् । ज॒र्त॒िल॒य॒वा॒ग्वेति॑ ज॒र्त॒िल – य॒वा॒ग्व॑ ।
वा । जु॒हु॒यात् । ग॒वी॒धु॒क॒य॒वा॒ग्वेति॑ ग॒वी॒धु॒क – य॒वा॒ग्व॑ । वा । न ।
ग्रा॒म्यान् । प॒शून् । हि॒न॒स्ति॑ । न । आ॒र॒ण्य॒ान् । अथो॒ इति॑ । ख॒लु ।
आ॒हुः । अ॒ना॒हु॒ति॒रि॒त्य॒ना॒-हु॒तिः॑ । वै । ज॒र्त॒िलाः॑ । च । ग॒वी॒धु॒काः ।
च । इति॑ । अ॒ज॒क्षी॒रे॒णे॒त्य॒ज – क्षी॒रे॒ण॑ । जु॒हो॒ति॒ । आ॒ग्ने॒यी । वै ।
ए॒षा । यत् । अ॒जा । आ॒हु॒त्ये॒त्या – हु॒त्या॒ । ए॒व । जु॒हो॒ति॒ । न ।
ग्रा॒म्यान् । प॒शून् । हि॒न॒स्ति॑ । न । आ॒र॒ण्य॒ान् । अ॒ङ्गि॒र॒सः ।
सु॒व॒र्ग॒मि॒ति॑ सु॒वः – ग॒म् । लो॒क॒म् । य॒न्तः॑ । 10 (50)

TS 5.4.3.3

–ऽजा॒यां॑ घ॒र्मं प्रा॒सि॒ञ्च॒न्थ् सा शो॒च॒न्ती॑ प॒र्णं॑ प॒रा ऽजि॒हीत॑
सो॒(१)ऽर्को॑ ऽभ॒वत् तद॒र्क॒स्या॒र्क॒त्व॒म॒र्क॒प॒र्णेन॑ जु॒हो॒ति॒
स॒यो॒नि॒त्वा॒यो॒द॒ङ् ति॒ष्ठन् जु॒हो॒त्ये॒षा वै रु॒द्र॒स्य॒ दि॒ख् स्वा॒या॒मे॒व दि॒शि॒
रु॒द्रं नि॒र॒व॒द॒य॒ते च॒र॒मा॒या॒मि॒ष्ट॒का॒यां जु॒हो॒त्य॒न्त॒त ए॒व रु॒द्रं नि॒र॒व॒द॒य॒ते

त्रेधाविभक्तं जुहोति त्रय इमे लोका इमानेव लोकान्त् समावद्दीर्यान्
करोतीयत्यग्रे जुहोत्य- [] 11

TS 5.4.3.3 - Padam

अजायाम् । घर्मम् । प्रेति । असिञ्चन् । सा । शोचन्ती । पर्णम् ।
परेति । अजिहीत । सः । अर्कः । अभवत् । तत् । अर्कस्य ।
अर्कत्वमित्यर्क – त्वम् । अर्कपर्णेनेत्यर्क – पर्णेन । जुहोति ।
सयोनित्वायेति सयोनि – त्वाय । उदङ् । तिष्ठन् । जुहोति । एषा ।
वै । रुद्रस्य । दिक् । स्वायाम् । एव । दिशि । रुद्रम् । निरवदयत
इति निः-अवदयते । चरमायाम् । इष्टकायाम् । जुहोति । अन्ततः ।
एव । रुद्रम् । निरवदयत इति निः – अवदयते । त्रेधाविभक्तमिति
त्रेधा – विभक्तम् । जुहोति । त्रयः । इमे । लोकाः । इमान् । एव ।
लोकान् । समावद्दीर्यानिति समावत् – वीर्यान् । करोति । इयति ।
अग्रे । जुहोति । 11 (50)

TS 5.4.3.4

–थे॒यत्य॑थे॒यति॑ त्रय॑ इ॒मे लो॒का ए॒भ्य ए॒वैनं॑ लो॒केभ्यः॑ श॒मय॑ति ति॒स्र
उत्त॑रा आ॒हुती॑र्जु॒होति॑ षट् थ्सं प॒द्यन्ते॑ षड् वा ऋ॒तव॑ ऋ॒तुभि॑रे॒वैनं॑
श॒मय॑ति यदनु॒परि॒क्रामं॑ जुहु॒यादन्त॑रव॒चारि॑णं रु॒द्रं कुर्या॑दथो
खल्वा॒हुः कस्यां॑ वा अ॒ह दि॒शि रु॒द्रः कस्यां॑ वेत्यनु॒परि॒क्राम॑मे॒व
होत॑व्य–म॒परि॒वर्ग॑मे॒वैनं॑ श॒मय॑त्ये – [] 12

TS 5.4.3.4 - Padam

अथ॑ । इ॒यति॑ । अथ॑ । इ॒यति॑ । त्रयः॑ । इ॒मे । लो॒काः । ए॒भ्यः । ए॒व ।
ए॒नम् । लो॒केभ्यः॑ । श॒मय॑ति । ति॒स्रः । उत्त॑रा इत्युत् – त॒राः ।
आ॒हुती॑रि॒त्या–हु॒तीः । जु॒होति॑ । षट् । स॒मिति॑ । प॒द्यन्ते॑ । षट् । वै ।
ऋ॒तवः॑ । ऋ॒तुभि॑रि॒त्यृतु॑ – भिः॑ । ए॒व । ए॒नम् । श॒मय॑ति । यत् ।
अनु॒परि॒क्राम॑मि॒त्यनु॑ – प॒रि॒क्राम॑म् । जुहु॒यात् ।
अन्त॑रव॒चारि॑णमि॒त्यन्तः॑ – अ॒वचा॑रि॒णम् । रु॒द्रम् । कुर्या॑त् ।
अथो॑ इति॑ । खलु॑ । आ॒हुः । कस्या॑म् । वा । अ॒ह । दि॒शि । रु॒द्रः ।
कस्या॑म् । वा । इति॑ । अनु॒परि॒क्राम॑मि॒त्यनु॑ – प॒रि॒क्राम॑म् । ए॒व ।

हो॒त॒व्यम् । अप॑रि॒वर्ग॑मि॒त्यपरि॑ – वर्ग॑म् । ए॒व । ए॒नम् ।

श॒म॒य॒ति । 12 (50)

TS 5.4.3.5

–ता॒ वै दे॒वताः॑ सु॒वर्ग्या॑ या उ॒त्त॒मास्ता॑ यज॒मानं॑ वा॒चय॑ति ताभि॒रेवै॑नꣳ
सु॒वर्गं॑ लो॒कं ग॑मयति यं द्वि॒ष्यात् तस्य॑ सज्चरे॑ प॒शूनां॑ न्यस्येद् यः
प्र॒थमः॑ प॒शुर॑भि॒तिष्ठ॑ति स आ॒र्ति॒माच्छ॑ति ॥ 13

TS 5.4.3.5 - Padam

ए॒ताः । वै । दे॒वताः॑ । सु॒वर्ग्या॑ इति॑ सु॒वः – ग्याः॑ । याः । उ॒त्त॒मा
इ॒त्युत्–त॒माः । ताः । यज॒मानम् । वा॒चय॑ति । ताभिः॑ । ए॒व । ए॒नम् ।
सु॒वर्गमि॑ति सु॒वः–गम् । लो॒कम् । ग॒मय॑ति । यम् । द्वि॒ष्यात् । तस्य॑ ।
सज्च॑र इति॑ सं – चरे॑ । प॒शूनाम् । नी॒ति । अ॒स्येत् । यः । प्र॒थमः॑ ।
प॒शुः । अ॒भि॒तिष्ठ॑तीत्य॒भि – तिष्ठ॑ति । सः । आ॒र्ति॒म् । ए॒ति ।

ऋ॒च्छ॒ति ॥ 13 (30)

(प॒शूनां॑ – यँ॒न्तो – ऽग्ने॑ जुहो॒त्य – प॑रि॒वर्ग॑मे॒वै॑नꣳ श॒म॒य॒ति –
त्रि॒श॒च्च) (A3)

TS 5.4.4.1

अ॒श्मन्नु॒र्जमि॒ति॒ परि॑ षिञ्चति॑ मा॒र्जय॑त्ये॒वैन॒मथो॑ त॒र्पय॑त्ये॒व स ए॑नं
तृ॒प्तो ऽक्षु॑द्ध्य॒न्नशो॑च॒न्नमु॒ष्मिन् लो॒क उप॑ तिष्ठते॒ तृप्य॑ति प्र॒जया॑
प॒शुभि॑र्य॒ एवं वे॒द तां न॒ इष॒मूर्जं॑ धत्त॒ मरु॑तः स॒र्राणा॑ इत्या॒हान्नं॑
वा ऊ॒र्गन्नं॑ म॒रुतोऽन्न॑मे॒वाव रु॒न्धे ऽश्म॑स्ते क्षु॒दमुं॑ ते शु – [] 14

TS 5.4.4.1 - Padam

अ॒श्मन् । ऊ॒र्जम् । इति॑ । परि॑ति । सिञ्च॑ति । मा॒र्जय॑ति । ए॒व ।
ए॒नम् । अथो॑ इति॑ । त॒र्पय॑ति । ए॒व । सः । ए॒नम् । तृ॒प्तः ।
अ॒क्षुद्ध्य॑न् । अ॒शोच॑न् । अ॒मुष्मि॑न् । लो॒के । उपे॑ति । तिष्ठ॑ते ।
तृप्य॑ति । प्र॒जये॑ति प्र – जया॑ । प॒शुभि॑रिति॑ प॒शु – भिः । यः ।
ए॒वम् । वे॒द । ताम् । नः । इष॑म् । ऊ॒र्जम् । धत्त॑ । म॒रुतः॑ ।
स॒र्राणा॑ इति॑ सं – र्राणाः । इति॑ । आ॒ह । अ॒न्नम् । वै । ऊ॒र्क् ।
अ॒न्नम् । म॒रुतः॑ । अ॒न्नम् । ए॒व । अवे॑ति । रु॒न्धे । अ॒श्मन् । ते ।
क्षु॒त् । अ॒मुम् । ते । शुक् । 14 (50)

TS 5.4.4.2

–गृच्छतु॑ यं द्वि॒ष्म इत्या॑ह॒ यमे॒व द्वेष्टि॑ तम॒स्य क्षु॒धा च शु॒चा चार्प॑यति॒
त्रिः॑ परि॒षिञ्चन्॑ पर्येति॒ त्रिवृद्–वा॑ अ॒ग्निर्यावा॑नेवा–ग्निस्तस्य शुच॑
शम॑यति॒ त्रिः पुनः॑ पर्येति॒ षट् थ्सं॑ पद्यन्ते॒ षड् वा ऋ॒तव॑ ऋतु॒भिरे॒वास्य॑
शुच॑ शम॑यत्यपां॒ वा एतत् पु॒ष्पं यद्वे॑तसो॒ ऽपा॑ – [] 15

TS 5.4.4.2 - Padam

ऋच्छतु॑ । यम् । द्विष्मः॑ । इति॑ । आह॑ । यम् । एव॑ । द्वेष्टि॑ । तम् ।
अस्य॑ । क्षुधा॑ । च । शुचा॑ । च । अर्पयति॑ । त्रिः॑ । परिषिञ्चन्निति॑
परि – सिञ्चन् । परीति॑ । एति॑ । त्रिवृदिति॑ त्रि-वृत् । वै । अग्निः॑ ।
यावान् । एव॑ । अग्निः॑ । तस्य॑ । शुचम्॑ । शमयति॑ । त्रिः॑ । पुनः॑ ।
परीति॑ । एति॑ । षट् । समिति॑ । पद्यन्ते॑ । षट् । वै । ऋतवः॑ ।
ऋतुभिरित्यृतु-भिः॑ । एव॑ । अस्य॑ । शुचम्॑ । शमयति॑ । अपाम्॑ । वै ।
एतत्॑ । पुष्पम्॑ । यत् । वेतसः॑ । अपाम्॑ । 15 (50)

TS 5.4.4.3

शरो॑ ऽवका॒ वेतस॑शा॒खया॑ चावकाभिश्च॒ वि कर्ष॑त्यापो॒ वै शान्ताः॑
शान्ता॑भिरे॒वास्य॑ शुच॑ शम॑यति॒ यो वा अ॒ग्निं चि॒तं प्रथ॑मः

प॒शुर॑धि॒क्राम॑ती॒श्वरो॑ वै त॒ꣳ शु॒चा प्र॒दहो॑ म॒ण्डूके॑न वि क॒र्ष॒त्येष॑
वै प॒शूना॑-म॒नुप॑जीवनी॒यो न वा ए॒ष ग्रा॒म्येषु॑ प॒शुषु॑ हि॒तो
नाऽऽर॑ण्येषु तमेव शु॒चा ऽर्प॑यत्य॒ष्टाभिर्वि॑ क॒र्ष॒त्य- [] 16

TS 5.4.4.3 - Padam

शरः॑ । अव॑काः । वे॒तस॑शा॒खये॑ति वेतस - शा॒खया॑ । च ।
अव॑काभिः । च । वी॒ति । क॒र्ष॒ति । आपः॑ । वै । शा॒न्ताः ।
शा॒न्ताभिः॑ । ए॒व । अ॒स्य । शु॒चम् । श॒मय॑ति । यः । वै । अ॒ग्निम् ।
चि॒तम् । प्र॒थमः॑ । प॒शुः । अ॒धि॒क्राम॑तीत्य॒धि-क्राम॑ति । ई॒श्वरः॑ । वै ।
तम् । शु॒चा । प्र॒दह॑ इति प्र - दहः॑ । म॒ण्डूके॑न । वी॒ति । क॒र्ष॒ति ।
ए॒षः । वै । प॒शूना॑म् । अ॒नुप॑जीवनी॒य इत्य॑नुप - जी॒वनी॒यः । न ।
वै । ए॒षः । ग्रा॒म्येषु॑ । प॒शुषु॑ । हि॒तः । न । आ॒रण्येषु॑ । तम् । ए॒व ।
शु॒चा । अ॒र्पय॑ति । अ॒ष्टाभिः॑ । वी॒ति । क॒र्ष॒ति । 16 (50)

TS 5.4.4.4

-ष्टा॑क्षरा गाय॒त्री गा॒यत्रौ॑ ऽग्नि॒र्यावा॑-ने॒वाऽग्नि॑ स्तस्य शु॒चꣳ श॒मय॑ति
पा॒वक॑वतीभि॒रन्नं॑ वै पा॒वको॑ ऽन्ने॒नैवा॑स्य शु॒चꣳ श॒मय॑ति मृ॒त्युर्वा

ए॒ष यद॒ग्निर्ब्र॑ह्म॒ण ए॒तद्रू॑पं य॒त् कृ॑ष्णाजि॒नं का॒र्ष्णी उ॒पा॒नहा॒वुप॑
मु॒ञ्च॒ते ब्र॑ह्म॒णैव॑ मृ॒त्यो॒रन्त॑र्द्ध॒त्ते ऽन्त॑र्मृ॒त्योर्द्ध॑त्ते ऽन्त॒रन्ना॒द्या-
दि॒त्याहु॑र॒न्या-मु॒पमु॒ञ्च॒ते ऽन्यां॑ नान्त - [] 17

TS 5.4.4.4 - Padam

अ॒ष्टाक्ष॑रेत्य॒ष्टा-अ॒क्षरा॑ । गा॒यत्री॑ । गा॒यत्रः॑ । अ॒ग्निः । या॒वान् । ए॒व ।
अ॒ग्निः । तस्य॑ । शु॒चम् । श॒मय॑ति । पा॒वक॑वतीभि॒रिति॑
पा॒वक॑ - व॒तीभिः॑ । अ॒न्नम् । वै । पा॒वकः॑ । अ॒न्नेन॑ । ए॒व । अ॒स्य ।
शु॒चम् । श॒मय॑ति । मृ॒त्युः । वै । ए॒षः । यत् । अ॒ग्निः । ब्र॑ह्म॒णः ।
ए॒तत् । रू॒पम् । यत् । कृ॑ष्णाजि॒नमि॑ति कृष्ण - अ॒जिन॑म् ।
का॒र्ष्णी इ॒ति । उ॒पा॒नहौ॑ । उ॒पेति॑ । मु॒ञ्च॒ते । ब्र॑ह्म॒णा । ए॒व । मृ॒त्योः ।
अ॒न्तः । ध॒त्ते । अ॒न्तः । मृ॒त्योः । ध॒त्ते । अ॒न्तः ।
अ॒न्नाद्या॑दि॒त्यन्न॑ - अ॒द्यात् । इति॑ । आ॒हुः । अ॒न्याम् ।
उ॒पमु॒ञ्च॒त इत्यु॑प - मु॒ञ्च॒ते । अ॒न्याम् । न । अ॒न्तः । 17 (50)

TS 5.4.4.5

–रेव मृत्योर्द्धत्ते ऽवाऽन्नाद्यं रुन्धे नमस्ते हरसे शोचिष इत्याह
नमस्कृत्य हि वसीयाँस-मुपचरन्त्यन्यं ते अस्मत् तपन्तु हेतय
इत्याह यमेव द्वेष्टि तमस्य शुचा ऽर्पयति पावको अस्मभ्यं शिवो
भवेत्याहान्नं वै पावकोऽन्नमेवाव रुन्धे द्वाभ्यामधि क्रामति
प्रतिष्ठित्या अपस्यवतीभ्यां शान्त्यै ॥ 18

TS 5.4.4.5 - Padam

एव । मृत्योः । धत्ते । अवेति । अन्नाद्यमित्यन्न – अद्यम् । रुन्धे ।
नमः । ते । हरसे । शोचिषे । इति । आह । नमस्कृत्येति
नमः – कृत्य । हि । वसीयाँसम् । उपचरन्तीत्युप – चरन्ति ।
अन्यम् । ते । अस्मत् । तपन्तु । हेतयः । इति । आह । यम् । एव ।
द्वेष्टि । तम् । अस्य । शुचा । अर्पयति । पावकः ।
अस्मभ्यमित्यस्म – भ्यम् । शिवः । भव । इति । आह । अन्नम् ।
वै । पावकः । अन्नम् । एव । अवेति । रुन्धे । द्वाभ्याम् । अधीति ।
क्रामति । प्रतिष्ठित्या इति प्रति – स्थित्यै ।

अ॒प॒स्य॒व॒ती॒भ्या॒मि॒त्य॒प॒स्य॒ – व॒ती॒भ्या॒म् । शान्त्यै॑ ॥ 18 (49)

(शु – ग्वे॑त॒सोऽपा॑ – म॒ष्टाभि॑र्वि॒ कर्ष॑ति – नान्त –
रे॒कान्न॑पञ्चा॒शच्च॑) (A4)

TS 5.4.5.1

नृ॒षदे॒ वडि॑ति॒ व्या॒घा॒रय॑ति॒ पङ्क्त्या॑ ऽऽहु॒त्या य॒ज्ञमु॒खमा॑ र॒भते॑
ऽक्ष॑णया॒ व्या॒घा॒रय॑ति॒ तस्मा॑दक्ष॒णया॒ प॒शवो॑ ऽङ्गानि॒ प्र ह॑रन्ति॒
प्रति॑ष्ठित्यै॒ यद्-व॑षट्कु॒र्याद्-या॒तया॑माऽस्य॒ वषट्का॑रः स्याद्-यन्न
व॑षट्कु॒र्याद्-र॒क्षाँ॑सि॒ यज्ञँ॑ ह॒न्युर्वडि॑त्याह॒ परो॑क्षमे॒व व॑षट्
करो॑ति॒ नास्य॑ या॒तया॑मा॒ वषट्का॑रो भवति॒ न य॒ज्ञँ र॒क्षाँ॑सि
घ्नन्ति॒ हुता॑दो॒ वा अ॒न्ये दे॒वा- [] 19

TS 5.4.5.1 - Padam

नृ॒षद॒ इति॑ नृ – सदे॑ । वट् । इति॑ । व्या॒घा॒रय॑तीति॒ वि-आ॑घा॒रय॑ति ।
पङ्क्त्या॑ । आहु॒त्येत्या-हु॒त्या । य॒ज्ञमु॒खमि॑ति॒ यज्ञ॑ – मु॒खम् । एति॑ ।
र॒भते॑ । अ॒क्ष॒णया॑ । व्या॒घा॒रय॑तीति॒ वि – आ॑घा॒रय॑ति । तस्मात्॑ ।

अ॒क्ष॒ण॒या । प॒श॒वः । अ॒ङ्ग॒नि । प्रेति॑ । ह॒र॒न्ति॑ । प्र॒ति॒ष्ठि॒त्या इति॑
 प्र॒ति – स्थि॒त्यै । यत् । व॒षट्कु॒र्यादिति॑ व॒षट् – कु॒र्यात् । या॒तया॒मेति॑
 या॒त – या॒मा । अ॒स्य । व॒षट्का॒र इति॑ व॒षट्-का॒रः । स्या॒त् । यत् ।
 न । व॒षट्कु॒र्यादिति॑ व॒षट् – कु॒र्यात् । र॒क्षा॒सि॑ । य॒ज्ञम् । ह॒न्युः ।
 वट् । इति॑ । आ॒ह । प॒रोक्ष॒मिति॑ प॒रः – अ॒क्षम्॑ । ए॒व । व॒षट् ।
 क॒रोति॑ । न । अ॒स्य । या॒तया॒मेति॑ या॒त – या॒मा । व॒षट्का॒र इति॑
 व॒षट् – का॒रः । भ॒वति॑ । न । य॒ज्ञम् । र॒क्षा॒सि॑ । घ्न॒न्ति॑ ।
 हु॒ताद॑ इति॑ हु॒त – अ॒दः । वै । अ॒न्ये । दे॒वाः । 19 (50)

TS 5.4.5.2

अ॒हु॒तादो॑ ऽन्ये॑ ता॒न॒ग्नि॒चि॒दे॒वोभ॑या॒न् प्री॑णाति॒ ये दे॒वा दे॒वाना॑मिति॑
 द॒ध्ना म॑धुमि॒श्रेणा॑वो॒क्षति॑ हु॒ताद॑श्चै॒व दे॒वान॑हु॒ताद॑श्च॒ यज॑मानः
 प्री॑णाति॒ ते यज॑मानं प्री॒णन्ति॑ द॒ध्ने॒व हु॒तादः॑ प्री॒णाति॑ म॒धुषा॑
 ऽहु॒तादो॑ ग्रा॒म्यं वा॑ ए॒तद॒न्नं य॑द्-द॒ध्या॒रण्यं॑ म॒धु यद्-द॑ध्ना
 म॒धुमि॒श्रेणा॑-वो॒क्षत्यु॑भ॒यस्या॑-व॒रु॒द्ध्यै॑ गु॒मुष्टि॑ना॒वो॒क्षति॑
 प्रा॒जाप॑त्यो – [] 20

TS 5.4.5.2 - Padam

अ॒हु॒ताद॒ इत्य॑हु॒त – अदः॑ । अ॒न्ये । तान् । अ॒ग्नि॒चिदि॑त्य॒ग्नि-चित् ।
ए॒व । उ॒भया॑न् । प्री॒णाति॑ । ये । दे॒वाः । दे॒वाना॑म् । इति॑ । द॒ध्ना ।
म॒धुमि॑श्रेणेति॑ मधु – मि॒श्रेण॑ । अवेति॑ । उ॒क्षति॑ । हु॒ताद॒ इति॑
हु॒त – अदः॑ । च । ए॒व । दे॒वान् । अ॒हु॒ताद॒ इत्य॑हु॒त – अदः॑ ।
च । यज॑मानः । प्री॒णाति॑ । ते । यज॑मानम् । प्री॒णन्ति॑ । द॒ध्ना ।
ए॒व । हु॒ताद॒ इति॑ हु॒त – अदः॑ । प्री॒णाति॑ । म॒धुषा॑ । अ॒हु॒ताद॒
इत्य॑हु॒त – अदः॑ । ग्रा॒म्यम् । वै । ए॒तत् । अ॒न्नम् । यत् । दधि॑ ।
आ॒र॒ण्यम् । म॒धु । यत् । द॒ध्ना । म॒धुमि॑श्रेणेति॑ मधु – मि॒श्रेण॑ ।
अ॒वोक्ष॑तीत्य॒व – उ॒क्षति॑ । उ॒भय॑स्य । अ॒वरु॑द्ध्य॒ इत्य॑व – रु॒ध्यै ।
गु॒मुष्टि॑ना॒ । अवेति॑ । उ॒क्षति॑ । प्रा॒जाप॑त्य॒ इति॑ प्रा॒जा-प॑त्यः । 20 (50)

TS 5.4.5.3

वै गु॒मुष्टिः॑ स॒योनि॑त्वाय॒ द्वाभ्यां॑ प्र॒तिष्ठि॑त्या अ॒नुप॑रि॒चार-मवो॑क्ष॒त्य-
प॑रि॒वर्ग॑मे॒वैनान्॑ प्री॒णाति॑ वि वा ए॒ष प्रा॒णैः प्र॒जया॑ प॒शुभिर्ऋ॑द्ध्यते
योऽग्निं॑ चि॒न्वन्न॑धि॒क्राम॑ति प्रा॒णदा॑ अ॒पान॑दा इत्याह प्रा॒णाने॒वाऽऽत्म॑न्

ध॒त्ते॒ व॒र्चो॒दा॒ व॒रि॒वो॒दा॒ इ॒त्या॒ह॒ प्र॒जा॒ वै॒ व॒र्चः॑ प॒श॒वो॒ व॒रि॒वः॑ प्र॒जा॒मे॒व
प॒शूना॒त्मन् ध॒त्त इन्द्रो॑ वृ॒त्रम॒हन् तं वृ॒त्रो – [] 21

TS 5.4.5.3 - Padam

वै । गु॒मु॒ष्टिः॑ । स॒यो॒नि॒त्वा॒येति॑ स॒यो॒नि – त्वा॒य॑ । द्वा॒भ्याम्॑ । प्र॒ति॒ष्ठि॒त्या
इति॑ प्र॒ति – स्थि॒त्यै॑ । अ॒नु॒परि॒चार॒मित्य॑नु – प॒रि॒चारम्॑ । अ॒वेति॑ ।
उ॒क्ष॒ति॑ । अ॒परि॒वर्ग॒मित्य॑परि – वर्ग॒म् । ए॒व । ए॒नान्॑ । प्री॒णा॒ति॑ ।
वी॒ति॑ । वै । ए॒षः॑ । प्रा॒णैरि॑ति प्र – अ॒नैः॑ । प्र॒ज॒येति॑ प्र – ज॒या॑ ।
प॒शुभि॑रिति प॒शु – भिः॑ । ऋ॒द्ध्य॑ते । यः॑ । अ॒ग्नि॒म् । चि॒न्वन्॑ ।
अ॒धि॒क्राम॒तीत्य॑धि – क्राम॒ति॑ । प्रा॒णदा॑ इति प्रा॒ण – दाः॑ । अ॒पा॒नदा॑
इत्य॑पा॒न – दाः॑ । इति॑ । आ॒ह॑ । प्रा॒णा॒नि॒ति॑ प्र – अ॒नान्॑ । ए॒व ।
आ॒त्मन्॑ । ध॒त्ते॒ । व॒र्चो॒दा॒ इति॑ व॒र्चः॑ – दाः॑ । व॒रि॒वो॒दा॒ इति॑
व॒रि॒वः॑ – दाः॑ । इति॑ । आ॒ह॑ । प्र॒जे॒ति॑ प्र – जा॑ । वै । व॒र्चः॑ ।
प॒श॒वः॑ । व॒रि॒वः॑ । प्र॒जा॒मि॒ति॑ प्र – जा॒म् । ए॒व । प॒शून्॑ । आ॒त्मन्॑ ।
ध॒त्ते॒ । इन्द्रः॑ । वृ॒त्रम्॑ । अ॒हन्॑ । तम् । वृ॒त्रः॑ । 21 (50)

TS 5.4.5.4

हतः षोडशभिर्भोगैरसिनात् स एतामग्नयेऽनीकवत् आहुतिमपश्यत्
तामजुहोत् तस्याग्निरनी कवान्त्स्वेन भागधेयेन प्रीतः षोडशधा
वृत्रस्य भोगानप्यदहद्-वैश्वकर्मणेन पाप्मनो नि-रमुच्यत
यदग्नयेऽनीकवत् आहुतिं जुहोत्यग्निरेवा-स्यानीकवान्त्स्वेन
भागधेयेन प्रीतः पाप्मानमपि दहति वैश्वकर्मणेन पाप्मनो निर्मुच्यते
यं कामयेत चिरं पाप्मनो - [] 22

TS 5.4.5.4 - Padam

हतः । षोडशभिरिति षोडश - भिः । भोगैः । असिनात् । सः ।
एताम् । अग्नये । अनीकवत् इत्यनीक - वते ।
आहुतिमित्या - हुतिम् । अपश्यत् । ताम् । अजुहोत् । तस्य ।
अग्निः । अनीकवानित्यनीक - वान् । स्वेन । भागधेयेनेति
भाग - धेयेन । प्रीतः । षोडशधेति षोडश-धा । वृत्रस्य । भोगान् ।
अपीति । अदहत् । वैश्वकर्मणेनेति वैश्व - कर्मणेन । पाप्मनः ।
निरिति । अमुच्यत । यत् । अग्नये । अनीकवत् इत्यनीक - वते ।

आहु॑ति॒मित्या॑ – हु॒तिम् । जु॒होति॑ । अ॒ग्निः । ए॒व । अ॒स्य ।
अनी॑क॒वानि॒त्यनी॑क – वा॒न् । स्वे॑न । भा॒गधे॑ये॒नेति॑ भा॒ग – धे॑ये॒न ।
प्री॒तः । पा॒प्मान॑म् । अपी॑ति । द॒हति॑ । वै॒श्वक॑र्म॒णेने॑ति
वै॒श्व – क॑र्म॒णेन॑ । पा॒प्मनः॑ । नि॒रिति॑ । मु॒च्यते॑ । यम् । का॒मये॑त ।
चि॒रम् । पा॒प्मनः॑ । 22 (50)

TS 5.4.5.5

निर्मु॑च्ये॒तेत्ये॑कै॒कं तस्य॑ जुहु॒याच्चि॒रमे॒व पा॒प्मनो॑ निर्मु॑च्यते॒ यं का॒मये॑त
ता॒जक् पा॒प्मनो॑ निर्मु॑च्ये॒तेति॑ सर्वा॑णि तस्या॑नु॒द्रुत्य॑ जुहु॒यात् ता॒जगे॒व
पा॒प्मनो॑ निर्मु॑च्यते ऽथो॒ खलु॒ नानै॒व सू॒क्ताभ्यां॑ जुहोति॒ नानै॒व
सू॒क्तयो॑र्वी॒र्यं द॒धात्य॑थो॒ प्रति॑ष्ठित्यै ॥ 23

TS 5.4.5.5 - Padam

नि॒रिति॑ । मु॒च्येत॑ । इति॑ । ए॒कै॒कमि॒त्येकं॑ – ए॒कम् । तस्य॑ । जुहु॒यात् ।
चि॒रम् । ए॒व । पा॒प्मनः॑ । नि॒रिति॑ । मु॒च्यते॑ । यम् । का॒मये॑त ।
ता॒जक् । पा॒प्मनः॑ । नि॒रिति॑ । मु॒च्येत॑ । इति॑ । सर्वा॑णि । तस्य॑ ।
अ॒नु॒द्रुत्ये॑त्यनु॒द्रुत्य॑ । जुहु॒यात् । ता॒जक् । ए॒व । पा॒प्मनः॑ । नि॒रिति॑ ।

मु॒च्य॒ते । अ॒थो इति॑ । ख॒लु । ना॒ना॑ । ए॒व । सू॒क्ता॒भ्या॒मिति॑

सु – उ॒क्ता॒भ्या॒म् । जु॒होति॑ । ना॒ना॑ । ए॒व । सू॒क्तयो॒रिति॑

सु – उ॒क्तयोः॑ । वी॒र्य॑म् । द॒धाति॑ । अ॒थो इति॑ ।

प्रति॑ष्ठित्या इति॑ प्रति॑ – स्थि॒त्यै ॥ 23 (40) (दे॒वाः – प्रा॑जाप॒त्यो –

वृ॒त्र – श्चि॒रं पा॒प्मन॑ – श्चत्वा॒रि॒ञ्च॑) (A5)

TS 5.4.6.1

उदे॑नमु॒त्तरां॑ न॒येति॑ स॒मिध॑ आ द॒धाति॑ यथा॒ जनं॑ य॒ते ऽव॒सं क॒रोति॑
तादृ॑गे॒व तत् ति॒स्र आ द॒धाति॑ त्रि॒वृद्-वा॑ अ॒ग्निर्या॒वाने॒वाग्नि॑ स्तस्मै॑
भा॒गधे॑यं क॒रोत्यौ॑दु॒म्बरी-॑र्भ॒वन्त्यू॒र्वा उ॒दुम्ब॑र ऊ॒र्जमे॒वास्मा॑ अपि॑
दधा॑त्यु॒दु त्वा वि॒श्वे दे॒वा इत्या॑ह प्रा॒णा वै वि॒श्वे दे॒वाः प्रा॒णै- [] 24

TS 5.4.6.1 - Padam

उदि॑ति । ए॒नम् । उ॒त्तरा॑मित्यु॒त् – त॒राम् । न॒य । इति॑ । स॒मिध॑ इति॑
सं – इ॒धः । एति॑ । द॒धाति॑ । यथा॑ । ज॒नम् । य॒ते । अ॒व॒सम् ।
क॒रोति॑ । तादृ॑क् । ए॒व । तत् । ति॒स्रः । एति॑ । द॒धाति॑ । त्रि॒वृदि॑ति
त्रि – वृ॒त् । वै । अ॒ग्निः । या॒वान् । ए॒व । अ॒ग्निः । तस्मै॑ ।

भा॒ग॒धे॒य॒मि॒ति॑ भा॒ग – धे॒य॒म् । क॒रो॒ति॑ । औ॒दु॒म्ब॒रीः॑ । भ॒व॒न्ति॑ । ऊ॒र्क् ।
वै । उ॒दु॒म्ब॒रः॑ । ऊ॒र्ज॒म् । ए॒व । अ॒स्मै । अ॒पी॒ति॑ । द॒धा॒ति॑ । उ॒दि॒ति॑ ।
उ । त्वा । वि॒श्वे॑ । दे॒वाः । इ॒ति॑ । आ॒ह । प्रा॒णा इ॒ति॑ प्र – अ॒नाः ।
वै । वि॒श्वे॑ । दे॒वाः । प्रा॒णैरि॒ति॑ प्र – अ॒नैः । 24 (50)

TS 5.4.6.2

–रे॒वैन॒मुद्–य॒च्छ॒ते॑ ऽग्ने॒ भर॑न्तु चि॒त्ति॒भि॒रि॒त्या॒ह॒ यस्मा॑ ए॒वैनं॑
चि॒त्ता॒यो॒द्य॒च्छ॒ते॑ ते॒नै॒वैन॑ꣳ स–म॒र्द्ध॒य॒ति॑ पञ्च दि॒शो दै॒वीर्य॑ज॒मव॑न्तु
दे॒वीरि॒त्या॒ह॒ दि॒शो ह्ये॒षोऽनु॑ प्र॒च्य॒व॒ते॑ ऽपाम॑तिं दु॒र्म॒तिं बा॑ध॒मा॒ना
इ॒त्या॒ह॒ रक्ष॑सा॒मप॑हत्यै रा॒यस्पो॑षे य॒ज्ञप॑ति–मा॒भज॑न्तीरि॒त्या॒ह॒ प॒शवो॑
वै रा॒यस्पो॑षः – [] 25

TS 5.4.6.2 - Padam

ए॒व । ए॒न॒म् । उ॒दि॒ति॑ । य॒च्छ॒ते॑ । अ॒ग्ने॑ । भर॑न्तु चि॒त्ति॒भि॒रि॒ति॑
चि॒त्ति॑ – भिः । इ॒ति॑ । आ॒ह । य॒स्मै । ए॒व । ए॒न॒म् । चि॒त्ता॒य॑ ।
उ॒द्य॒च्छ॒त॒ इत्यु॑त्–य॒च्छ॒ते॑ । ते॒न । ए॒व । ए॒न॒म् । स॒मि॒ति॑ । अ॒र्द्ध॒य॒ति॑ ।
पञ्च॑ । दि॒शः । दै॒वीः । य॒ज्ञ॒म् । अ॒व॒न्तु॑ । दे॒वीः । इ॒ति॑ । आ॒ह ।

दि॒शः । हि । ए॒षः । अ॒न्वि॒ति । प्र॒च्य॒वत॒ इति॑ प्र – च्य॒वते॑ । अ॒पेति॑ ।
अ॒म॒तिम् । दु॒र्म॒तिमि॑ति दुः – म॒तिम् । बा॒ध॒मा॒नाः । इति॑ । आ॒ह ।
र॒क्ष॒साम् । अ॒प॒ह॒त्या इत्य॑प – ह॒त्यै । रा॒यः । पो॒षे ।
य॒ज्ञ॒प॒तिमि॑ति य॒ज्ञ-प॒तिम् । आ॒भ॒ज॒न्तीरि॑त्या – भ॒ज॒न्तीः । इति॑ ।
आ॒ह । प॒श॒वः । वै । रा॒यः । पो॒षः । 25 (50)

TS 5.4.6.3

प॒शू॒ने॒वा॒व रु॒न्धे ष॒ड्भि॑र्. ह॒रति॑ ष॒ट् वा ऋ॒तव॑ ऋ॒तुभि॑रे॒वैन॑
ह॒रति॑ द्वे प॒रिगृ॑ह्य॒वती॑ भ॒वतो॑ र॒क्ष॒साम॑प॒ह॒त्यै सू॒र्य॑र॒श्मिर्. ह॒रि॑केशः
पु॒र॒स्तादि॑त्या॒ह प्र॒सू॒त्यै ततः॑ पा॒वका॑ आ॒शि॒षो नो॑ जु॒षन्ता॑मि॒त्याहा॒न्नं
वै पा॒व॒कोऽन्न॑मे॒वा॒व रु॒न्धे दे॒वा॒सु॒राः सँय॑त्ता आ॒सन् ते॑ दे॒वा
ए॒त-द॑प्र॒तिर॑थ-म॒प॒श्यन् ते॒न वै ते॑ ऽप्र॒त्य- [] 26

TS 5.4.6.3 - Padam

प॒शून् । ए॒व । अ॒वेति॑ । रु॒न्धे । ष॒ड्भि॑रि॒ति ष॒ट्-भिः । ह॒रति॑ । ष॒ट् ।
वै । ऋ॒तवः॑ । ऋ॒तुभि॑रि॒त्यृ॒तु – भिः । ए॒व । ए॒नम् । ह॒रति॑ । द्वे इति॑ ।
प॒रिगृ॑ह्य॒वती॑ इति॑ प॒रिगृ॑ह्य – व॒ती । भ॒वतः॑ । र॒क्ष॒साम् ।

अप॑ह॒त्या इ॒त्यप॑ – ह॒त्यै । सूर्य॑र॒श्मिरि॑ति सूर्य॑ – र॒श्मिः । हरि॑केश॒
इति॑ हरि॑-केशः । पु॒रस्ता॑त् । इति॑ । आ॒ह । प्र॒सूत्या॑ इति॑ प्र-सू॒त्यै ।
ततः॑ । पा॒वकाः । आ॒शिष॑ इत्या॑ – शिषः॑ । नः॑ । जु॒षन्ता॑म् । इति॑ ।
आ॒ह । अ॒न्नम् । वै । पा॒वकः॑ । अ॒न्नम् । ए॒व । अ॒वेति॑ । रु॒न्धे ।
दे॒वा॒सुरा॑ इति॑ दे॒व-अ॒सुराः॑ । सँय॑त्ता इति॑ सं – य॒त्ताः । आ॒सन् ।
ते । दे॒वाः । ए॒तत् । अ॒प्रति॑रथ॒मित्य॑प्रति – र॒थम् । अ॒पश्य॑न् । तेन॑ ।
वै । ते । अ॒प्रति॑ । 26 (50)

TS 5.4.6.4

-सुरा॑नजयन् तद॑प्रतिरथस्या-प्रतिरथ॒त्वं यँद॑प्रतिरथं द्वितीयो
होता ऽन्वाहा॑प्रत्ये॒व तेन॑ यज॒मानो॑ भ्रातृ॒व्यान् ज॑यत्यथो
अ॒नभि॑जितमे॒वाभि॑ जयति द॒शर्चं॑ भवति द॒शाक्ष॑रा वि॒राड् वि॒राजे॒मौ
लो॒कौ वि॑धृता॒वनयो॑र्लो॒कयोर्वि॑धृत्या अथो द॒शाक्ष॑रा वि॒राडन्नं॑ वि॒राड्
वि॒राज्ये॒वान्नाद्ये॑ प्रति॑ तिष्ठत्य॒सदिव॑ वा अ॒न्तरि॑क्ष-म॒न्तरि॑क्ष-
मि॒वाऽऽग्नी॑द्ध्रमा॒ग्नीद्ध्रे॑-[] 27

TS 5.4.6.4 - Padam

अ॒सु॒रा॒न् । अ॒ज॒य॒न् । तत् । अ॒प्र॒ति॒र॒थ॒स्ये॒त्य॒प्र॒ति – र॒थ॒स्य॒ ।
अ॒प्र॒ति॒र॒थ॒त्व॒मि॒त्य॒प्र॒ति॒र॒थ – त्व॒म् । यत् । अ॒प्र॒ति॒र॒थ॒मि॒त्य॒प्र॒ति – र॒थ॒म् ।
द्वि॒तीयः॑ । हो॒ता॑ । अ॒न्वा॒हे॒त्य॒नु – आ॒ह॑ । अ॒प्र॒ति॒ ।
ए॒व । ते॒न॑ । य॒ज॒मा॒नः॑ । भ्रा॒तृ॒व्या॒न् । ज॒य॒ति॒ । अ॒थो॒ इति॑ ।
अ॒न॒भि॒जि॒त॒मि॒त्य॒न॒भि – जि॒त॒म् । ए॒व । अ॒भी॒ति॒ । ज॒य॒ति॒ ।
द॒श॒र्च॒मि॒ति॒ द॒श – ऋ॒च॒म् । भ॒व॒ति॒ । द॒शा॒क्ष॒रे॒ति॒ द॒श – अ॒क्ष॒रा॒ ।
वि॒रा॒डि॒ति॒ वि – रा॒ट् । वि॒रा॒जे॒ति॒ वि – रा॒जा॑ । इ॒मौ॑ । लो॒कौ॑ ।
वि॒धृ॒ता॒वि॒ति॒ वि – धृ॒तौ॑ । अ॒न॒योः॑ । लो॒क॒योः॑ । वि॒धृ॒त्या॒ इति॑
वि – धृ॒त्यै॑ । अ॒थो॒ इति॑ । द॒शा॒क्ष॒रे॒ति॒ द॒श – अ॒क्ष॒रा॒ । वि॒रा॒डि॒ति॒
वि – रा॒ट् । अ॒न्न॒म् । वि॒रा॒डि॒ति॒ वि – रा॒ट् । वि॒रा॒जी॒ति॒ वि – रा॒जि॑ ।
ए॒व । अ॒न्ना॒द्य॒ इत्य॑न्न – अ॒द्यै॑ । प्र॒ती॒ति॒ । ति॒ष्ठ॒ति॒ । अ॒स॒त् । इ॒व॒ । वै॒ ।
अ॒न्त॒रि॒क्ष॒म् । अ॒न्त॒रि॒क्ष॒म् । इ॒व॒ । आ॒ग्नी॒ध्र॒मि॒त्या॒ग्नि॑ – इ॒ध्र॒म् ।
आ॒ग्नी॒ध्र॒ इत्या॑ग्नि – इ॒ध्रे॑ । 27 (50)

TS 5.4.6.5

अ॒श्मा॒नं॑ नि॒ द॒धा॒ति॑ स॒त्त्वा॒य॑ द्वा॒भ्यां॑ प्र॒ति॒ष्ठि॒त्यै॑ वि॒मा॒न ए॒ष दि॒वो॑
म॒द्ध्य॑ आ॒स्त इ॒त्या॒ह व्ये॒वैत॑या मि॒मी॒ते म॒द्ध्ये॑ दि॒वो नि॒हि॒तः॑
पृ॒श्नि॒र॒श्मे॒त्या॒हा॒न्नं॑ वै पृ॒श्न्य॒न्नमे॒वाव॑ रु॒न्धे च॒त॒सृ॒भि॒रा पु॒च्छा॑देति
च॒त्वा॒रि॒ छन्दा॑ꣳसि॒ छन्दा॑भि॒रेवे॒न्द्रं॑ वि॒श्वा अ॒वी॒वृ॒ध॒न्नि॒त्या॒ह
वृ॒द्धि॒मे॒वोपा॑वर्तते॒ वाजा॑नाꣳ स॒त्प॒तिं॑ प॒ति- [] 28

TS 5.4.6.5 - Padam

अ॒श्मा॒नम् । नी॒ति । द॒धा॒ति । स॒त्त्वा॒येति॑ स॒त् - त्वा॒य॑ । द्वा॒भ्याम् ।
प्र॒ति॒ष्ठि॒त्या इति॑ प्र॒ति - स्थि॒त्यै । वि॒मा॒न इति॑ वि - मा॒नः ।
ए॒षः । दि॒वः । म॒द्ध्ये॑ । आ॒स्ते । इति॑ । आ॒ह । वी॒ति । ए॒व । ए॒तया॑ ।
मि॒मी॒ते । म॒द्ध्ये॑ । दि॒वः । नि॒हि॒त इति॑ नि - हि॒तः । पृ॒श्निः ।
अ॒श्मा॑ । इति॑ । आ॒ह । अ॒न्नम् । वै । पृ॒श्नि॑ । अ॒न्नम् । ए॒व ।
अ॒वेति॑ । रु॒न्धे । च॒त॒सृ॒भि॒रिति॑ च॒त॒सृ-भिः॑ । ए॒ति । पु॒च्छा॑त् । ए॒ति ।
च॒त्वा॒रि॒ छन्दा॑ꣳसि । छन्दा॑भि॒रिति॑ छन्दाः - भिः॑ । ए॒व । इ॒न्द्रम् ।
वि॒श्वाः । अ॒वी॒वृ॒ध॒न् । इति॑ । आ॒ह । वृ॒द्धि॑म् । ए॒व ।

उपावर्तत॑ इत्युप॑-आवर्तते॑ । वाजानाम्॑ । सत्पति॑मिति॒ सत् - पति॑म् ।
पति॑म् ॥ 28 (50)

TS 5.4.6.6

-मित्या॒हान्नं॑ वै वाजो॑ ऽन्नमे॒वाव॑ रुन्धे सु॒म्नहूर्य॑ज्ञो दे॒वाः॑ आ च॑
वक्ष॑दित्याह प्रजा॒ वै प॒शवः॑ सु॒म्नं प्र॒जामे॒व प॒शूना॒त्मन् ध॑त्ते
यक्ष॑दग्निर्दे॒वो दे॒वाः॑ आ च॑ वक्ष॑दित्याह स्व॒गाकृत्यै॑
वाज॑स्य मा प्रस॒वे-नो॑द्ग्रा॒भेणो॑-दग्र॒भी-दि॒त्याहा॒सौ वा आ॑दित्य
उद्य॑न्नुद्ग्रा॒भ ए॒ष () नि॒म्रोच॑न् नि॒ग्राभो॑ ब्रह्म॒णैवा॑ऽऽत्मान॑-मुद्गृ॒ह्णाति॑
ब्रह्म॑णा भ्रातृ॒व्यं नि गृ॑ह्णाति ॥ 29

TS 5.4.6.6 - Padam

इति॑ । आ॒ह । अ॒न्नम्॑ । वै । वाजः॑ । अ॒न्नम्॑ । ए॒व । अ॒वेति॑ । रु॒न्धे ।
सु॒म्नहूरि॑ति सु॒म्न - हूः । य॒ज्ञः । दे॒वान् । ए॒ति । च॒ । व॒क्षत् ।
इति॑ । आ॒ह । प्र॒जेति॑ प्र - जा । वै । प॒शवः॑ । सु॒म्नम् । प्र॒जामि॑ति
प्र - जा॑म् । ए॒व । प॒शून् । आ॒त्मन् । ध॑त्ते । यक्ष॑त् । अ॒ग्निः ।
दे॒वः । दे॒वान् । ए॒ति । च॒ । व॒क्षत् । इति॑ । आ॒ह ।

स्व॒गाकृ॑त्या इति॑ स्व॒गा – कृ॒त्यै । वा॒जस्य॑ । मा । प्र॒सवे॑नेति॑
 प्र – स॒वेन॑ । उ॒द्ग्रा॒भेणे॑त्युत्-ग्रा॒भेण॑ । उ॒दिति॑ । अ॒ग्रभी॑त् । इति॑ ।
 आ॒ह । अ॒सौ । वै । आ॒दित्यः॑ । उ॒द्यन्नि॑त्युत् – यन् । उ॒द्ग्रा॒भ
 इत्यु॑त् – ग्रा॒भः । ए॒षः () । नि॒म्रोच॑न्निति॑ नि – म्रोच॑न् ।
 नि॒ग्रा॒भ इति॑ नि – ग्रा॒भः । ब्र॒ह्मणा॑ । ए॒व । आ॒त्मान॑म् ।
 उ॒द्गृह्णा॑तीत्युत् – गृ॒ह्णाति॑ । ब्र॒ह्मणा॑ । भ्रातृ॑व्यम् । नीति॑ ।
 गृ॒ह्णाति॑ ॥ 29 (60) (प्रा॒णैः – पो॒षो – ऽप्र॒त्या – ग्नी॒द्धे – पति॑ –
 मेष॑ – दश॑ च) (A6)

TS 5.4.7.1

प्रा॒चीम॑नु प्र॒दिशं॑ प्रेहि॑ वि॒द्वानि॑त्याह दे॒वलोक॑-मे॒वैतयो॑पावर्तते॑
 क्र॒म॒ध्वम॑ग्नि॒ना नाक॑-मि॒त्याहे॒माने॑वैतया॑ लो॒कान् क्र॑मते पृथि॒व्या
 अ॒हमु॑दन्तरि॒क्षमा ऽरु॑हमि॒त्याहे॒माने॑वैतया॑ लो॒कान्त् स॒मारो॑हति॑
 सु॒वर्य॑न्तो नापे॒क्षन्त॑ इत्या॒ह सु॒वर्गमे॑वैतया॑ लो॒कमे॒त्यग्ने॑ प्रेहि॑-[] 30

TS 5.4.7.1 - Padam

प्राची॑म् । अ॒न्वि॒ति॑ । प्र॒दि॒श॒मि॒ति॑ प्र-दि॒श॒म् । प्रे॒ति॑ । इ॒हि॒ । वि॒द्वान् ।
इति॑ । आ॒ह॒ । दे॒व॒लो॒क॒मि॒ति॑ दे॒व - लो॒क॒म् । ए॒व । ए॒तया॑ ।
उ॒पा॒व॒र्त॒त॒ इत्यु॑प - आ॒व॒र्त॒ते॑ । क्र॒म॒ध्व॒म् । अ॒ग्नि॒ना॑ । ना॒क॒म् ।
इति॑ । आ॒ह॒ । इ॒मान् । ए॒व । ए॒तया॑ । लो॒कान् । क्र॒म॒ते॑ । पृ॒थि॒व्याः ।
अ॒ह॒म् । उ॒दि॒ति॑ । अ॒न्त॒रि॒क्ष॒म् । ए॒ति॑ । अ॒रु॒ह॒म् । इति॑ । आ॒ह॒ ।
इ॒मान् । ए॒व । ए॒तया॑ । लो॒कान् । स॒मा॒रो॒ह॒ती॒ति॑ सं - आ॒रो॒ह॒ति॑ ।
सु॒वः॑ । य॒न्तः॑ । न । अ॒पे॒ति॑ । ई॒क्ष॒न्ते॑ । इति॑ । आ॒ह॒ ।
सु॒व॒र्ग॒मि॒ति॑ सु॒वः॑ - ग॒म् । ए॒व । ए॒तया॑ । लो॒क॒म् । ए॒ति॑ । अ॒ग्ने॑ ।
प्रे॒ति॑ । इ॒हि॒ । 30 (50)

TS 5.4.7.2

प्र॒थ॒मो॑ दे॒व॒य॒ता-मि॒त्या॒हो॒भ॒यै॒ष्वे॒वै॒तया॑ दे॒व॒म॒नु॒ष्ये॒षु चक्षु॑र्दधाति
पञ्च॑भि॒रधि॑ क्रा॒म॒ति॒ पा॒ङ्क्तो॑ य॒ज्ञो या॒वा॒ने॒व य॒ज्ञ स्ते॒न सह॑ सु॒व॒र्गं
लो॒क॒मे॒ति॑ न॒क्तो॒षा॒से॒ति॑ पु॒रो॒नु॒वा॒क्या॒म॒न्वा॒ह प्र॒त्या अ॒ग्ने॑

सहस्राक्षेत्याह साहस्रः प्रजापतिः प्रजापतेराप्त्यै तस्मै ते विधेम
वाजाय स्वाहेत्याहान्नं वै वाजो ऽन्नमेवाव – [] 31

TS 5.4.7.2 - Padam

प्रथमः । देवयतामिति देव – यताम् । इति । आह । उभयेषु । एव ।
एतया ॥ देवमनुष्येष्विति देव – मनुष्येषु । चक्षुः । दधाति ।
पञ्चभिरिति पञ्च – भिः । अधीति । क्रामति । पाङ्कः । यज्ञः ।
यावान् । एव । यज्ञः । तेन । सह । सुवर्गमिति सुवः – गम् ।
लोकम् । एति । नक्तोषासा ॥ इति । पुरोनुवाक्यामिति
पुरः – अनुवाक्याम् । अन्विति । आह । प्रत्यै ॥ अग्नै ॥
सहस्राक्षेति सहस्र – अक्ष । इति । आह । साहस्रः । प्रजापतिरिति
प्रजा – पतिः । प्रजापतेरिति प्रजा – पतेः । आप्त्यै ॥ तस्मै ॥ ते ।
विधेम । वाजाय । स्वाहा ॥ इति । आह । अन्नम् । वै ।
वाजः । अन्नम् । एव । अवेति । 31 (50)

TS 5.4.7.3

रुन्धे द॒ध्नः पू॒र्णामौ॑दु॒म्बरी॑ꣳ स्वयमा॒तृ॒ण्णायां॑ जुहो॒त्यूर्ग्वै॑
द॒ध्यूर्गु॑दु॒म्बरो॒ऽसौ स्वयमा॒तृ॒ण्णा ऽमु॒ष्यामे॒वोर्जं॑ दधाति
तस्मा॑द॒मुतो॒र्वाची॑-मूर्जमु॒प जी॒वाम॑ स्तिसृ॒भिः सा॒दयति॑ त्रि॒वृद्-वा
अ॒ग्निर्या॒वाने॒वाग्नि॒स्तं प्र॒तिष्ठां॑ गमयति॑ प्रे॒द्धो अ॒ग्ने दी॒दिहि॑ पु॒रो न
इत्यौ॑दु॒म्बरी॒मा द॒धात्ये॒षा वै सू॒र्मी क॑र्ण॒काव॒त्येतया॑ ह स्म - [] 32

TS 5.4.7.3 - Padam

रुन्धे । द॒ध्नः । पू॒र्णाम् । औ॑दु॒म्बरीम् । स्वयमा॒तृ॒ण्णाया॒मिति॑
स्वयं - आ॒तृ॒ण्णाया॒म् । जुहो॒ति । ऊ॒र्क् । वै । द॒धि । ऊ॒र्क् ।
उ॒दुम्ब॑रः । अ॒सौ । स्वयमा॒तृ॒ण्णेति॑ स्वयं - आ॒तृ॒ण्णा । अ॒मुष्या॑म् ।
ए॒व । ऊ॒र्जम् । द॒धाति॑ । तस्मा॑त् । अ॒मुतः॑ । अ॒र्वाची॑म् । ऊ॒र्जम् ।
उ॒पेति॑ । जी॒वामः॑ । ति॒सृ॒भिरिति॑ ति॒सृ - भिः॑ । सा॒दयति॑ ।
त्रि॒वृदि॑ति त्रि - वृत् । वै । अ॒ग्निः । या॒वान् । ए॒व । अ॒ग्निः । तम् ।
प्र॒तिष्ठा॑मिति॑ प्र॒ति-स्था॑म् । गमयति॑ । प्रे॒द्ध इति॑ प्र - इ॒द्धः । अ॒ग्ने ।

दी॒दि॒हि । पु॒रः । नः । इति॑ । औ॒दु॒म्ब॒री॒म् । एति॑ । द॒धा॒ति । ए॒षा । वै ।
सू॒र्मी । क॒र्ण॒का॒व॒तीति॑ क॒र्ण॒क – व॒ती । ए॒तया॑ । ह॒ । स्म॒ । 32 (50)

TS 5.4.7.4

वै दे॒वा अ॒सु॒राणा॑ꣳ श॒त॒त॒र्.हाꣳ स्तृꣳह॒न्ति॑ यदे॒तया॑ स॒मिध॑मा॒दधा॑ति
व॒ज्र॒मे॒वैत॑च्छ॒त॒घ्नीं॑ य॒ज॒मा॒नो भ्रा॑तृ॒व्याय॑ प्र ह॒रति॑ स्तृ॒त्या अ॒छ॒म्ब॒ट्का॑रं
वि॒धेम॑ ते प॒रमे॑ ज॒न्म॒न्न॒ग्ने इति॑ वैक॒ङ्क॒ती॒मा द॑धाति॒ भा ए॒वाव॑ रु॒न्धे
ताꣳ स॒वि॒तुर्व॑रे॒ण्यस्य॑ चि॒त्रा॒मि॒ति श॒मी॒मयी॑ꣳ शान्त्या॑ अ॒ग्नि॒र्वा ह॒ वा
अ॒ग्नि॒चि॒तं दु॒हेऽग्नि॑चिद्-वा ऽग्निं॑ दु॒हे ताꣳ – [] 33

TS 5.4.7.4 - Padam

वै । दे॒वाः । अ॒सु॒राणा॑म् । श॒त॒त॒र्.हा॑नि॒ति श॒त-त॒र्.हा॑न् । तृꣳह॒न्ति॑ ।
यत् । ए॒तया॑ । स॒मिध॑मि॒ति सं – इ॒धम् । आ॒द॒धा॒ती॒त्या – द॑धाति ।
व॒ज्र॒म् । ए॒व । ए॒तत् । श॒त॒घ्नी॑मि॒ति श॒त – घ्नी॑म् । य॒ज॒मा॒नः ।
भ्रा॑तृ॒व्याय॑ । प्रेति॑ । ह॒रति॑ । स्तृ॒त्यै । अ॒छ॒म्ब॒ट्का॑रमि॒त्य॒छ॒म्ब॒ट्-का॑रम् ।
वि॒धेम॑ । ते । प॒रमे॑ । ज॒न्म॒न् । अ॒ग्ने । इति॑ । वैक॒ङ्क॒ती॒म् । एति॑ ।
द॒धा॒ति । भाः । ए॒व । अ॒वेति॑ । रु॒न्धे । ता॒म् । स॒वि॒तुः । व॑रे॒ण्यस्य॑ ।

चित्राम् । इति । शमीमयीमिति शमी – मयीम् । शान्त्यै । अग्निः ।

वा । ह । वै । अग्निचितमित्यग्नि – चितम् । दुहे ।

अग्निचिदित्यग्नि – चित् । वा । अग्निम् । दुहे । ताम् । 33 (50)

TS 5.4.7.5

सवितुर्वरेण्यस्य चित्रामित्याहैष वा अग्नेर्दोह स्तमस्य कण्व

एव श्रायसो ऽवेत् तेन ह स्मैन स दुहे यदेतया समिध-

मादधात्यग्निचिदेव तदग्निं दुहे सप्त ते अग्ने समिधः

सप्त जिह्वा इत्याह सप्तैवास्य साप्तानि प्रीणाति पूर्णया जुहोति

पूर्ण इव हि प्रजापतिः प्रजापते – [] 34

TS 5.4.7.5 - Padam

सवितुः । वरेण्यस्य । चित्राम् । इति । आह । एषः । वै । अग्नेः ।

दोहः । तम् । अस्य । कण्वः । एव । श्रायसः । अवेत् । तेन ।

ह । स्म । एनम् । सः । दुहे । यत् । एतया । समिधमिति

सं – इधम् । आदधातीत्या – दधाति । अग्निचिदित्यग्नि – चित् ।

एव । तत् । अग्निम् । दुहे । सप्त । ते । अग्ने । समिध इति

सं – इ॒धः । स॒प्त । जि॒ह्वाः । इति॑ । आ॒ह । स॒प्त । ए॒व । अ॒स्य ।
सा॒प्ता॒नि । प्री॒णा॒ति । पू॒र्ण॒या॑ । जु॒हो॒ति । पू॒र्णः । इ॒व । हि ।
प्र॒जा॒प॒ति॒रिति॑ प्र॒जा – प॒तिः । प्र॒जा॒प॒ते॒रिति॑ प्र॒जा – प॒तेः । 34 (50)

TS 5.4.7.6

–रा॒प्त्यै न्यून॑या जु॒हो॒ति न्यून॑ाद्धि प्र॒जा॒प॒तिः प्र॒जा अ॒सृ॒जत॑ प्र॒जा॒ना॒ꣳ
सृ॒ष्ट्या अ॒ग्नि॒र्दे॒वेभ्यो॑ नि॒ला॒यत॑ स दि॒शोऽनु॑ प्रा–वि॒शज्जु॑ह्वन्म॒नसा॑
दि॒शो॑ ध्या॒येद्–दि॒ग्भ्य ए॒वैन॑म॒व रु॒न्धे द॒ध्ना पु॒रस्ता॑ज्जु॒हो॒त्या–
ज्ये॒नोप॑रि॒ष्टात् तेज॑श्चै॒वास्मा॑ इन्द्रि॒यं च॑ स॒मीची॑ द॒धाति॑ द्वा॒दश॑क॒पालो॑
वैश्वा॒नरो॑ भ॒वति॑ द्वा॒दश॑ मा॒साः सँव॑त्सरः सँव॑त्सरो॑ ऽग्नि॒र्वैश्वा॒नरः॑

साक्षा– [] 35

TS 5.4.7.6 - Padam

आ॒प्त्यै॑ । न्यून॑येति॒ नि–ऊ॒नया॑ । जु॒हो॒ति । न्यून॑ादिति॒ नि – ऊ॒नात् ।
हि । प्र॒जा॒प॒ति॒रिति॑ प्र॒जा – प॒तिः । प्र॒जा इति॑ प्र – जाः ।
अ॒सृ॒जत॑ । प्र॒जा॒ना॒मिति॑ प्र – जा॒नाम् । सृ॒ष्ट्यै॑ । अ॒ग्निः । दे॒वेभ्यः॑ ।
नि॒ला॒यत॑ । सः । दि॒शः । अनु॑ । प्रेति॑ । अ॒वि॒शत् । जु॒ह्वत् । म॒नसा॑ ।

दि॒शः । ध्या॒येत् । दि॒ग्भ्य॑ इति॑ दिक् – भ्यः । ए॒व । ए॒नम् । अ॒वेति॑ ।
 रु॒न्धे । द॒ध्ना । पु॒रस्ता॑त् । जु॒होति॑ । आ॒ज्ये॑न । उ॒परि॑ष्ठात् ।
 तेजः । च । ए॒व । अ॒स्मै । इ॒न्द्रि॒यम् । च । स॒मीची॑ इति॑ । द॒धाति॑ ।
 द्वा॒दश॑क॒पाल॑ इति॑ द्वा॒दश॑ – क॒पालः । वै॒श्वान॑रः । भ॒वति॑ । द्वा॒दश॑ ।
 मा॒साः । सँ॒वत्स॑र इति॑ सं॒वत्स॑रः । सँ॒वत्स॑र इति॑ सं॒वत्स॑रः ।
 अ॒ग्निः । वै॒श्वान॑रः । सा॒क्षादि॑ति स – अ॒क्षात् । 35 (50)

TS 5.4.7.7

–दे॒व वै॒श्वान॑रम॒व रु॒न्धे यत् प्र॑या॒जानू॒याजान् कुर्या॑द्–वि॒कस्तिः॑ सा
 य॒ज्ञस्य॑ द॒र्विहो॑मं क॒रोति॑ य॒ज्ञस्य॑ प्र॒तिष्ठि॑त्यै रा॒ष्ट्रं वै वै॒श्वान॑रो
 वि॒ण् म॒रुतो॑ वै॒श्वान॑रꣳ हु॒त्वा मा॒रुतान् जु॑होति रा॒ष्ट्र ए॒व वि॒शम॑नु
 ब॒ध्नात्यु॒च्चै–वै॒श्वान॑रस्याऽऽश्रा॒वय॑त्युपाꣳशु मा॒रुतान् जु॑होति
 तस्मा॑द्–रा॒ष्ट्रं वि॒शम॑ति व॒दति॑ मा॒रुता॑ भ॒वन्ति॑ म॒रुतो॑ वै दे॒वानां॑ वि॒शो
 दे॒ववि॒शेनै॑वा॒स्मै म॒नुष्य॑वि॒श () –म॒व रु॒न्धे स॒प्त भ॑वन्ति स॒प्तग॑णा
 वै म॒रुतो॑ ग॒णश॑ ए॒व वि॒शम॑व रु॒न्धे ग॒णेन॑ ग॒णम॑नु॒द्रुत्य॑ जु॒होति॑
 वि॒शमे॑वा॒स्मा अ॒नुव॑र्त्मानं क॒रोति॑ ॥ 36

TS 5.4.7.7 - Padam

ए॒व । वै॒श्वा॒न॒र॒म् । अ॒वे॒ति॑ । रु॒न्धे॑ । यत् । प्र॒या॒जा॒नू॒या॒जा॒नि॒ति॑
प्र॒या॒ज – अ॒नू॒या॒जा॒न् । कु॒र्या॒त् । वि॒क॒स्ति॒रि॒ति॑ वि – क॒स्तिः॑ ।
सा । य॒ज्ञ॒स्य॑ । द॒र्वि॒हो॒म॒मि॒ति॑ द॒र्वि – हो॒म॒म् । क॒रो॒ति॑ । य॒ज्ञ॒स्य॑ ।
प्र॒ति॒ष्ठि॒त्या॒ इति॑ प्र॒ति – स्थि॒त्यै॑ । रा॒ष्ट्र॒म् । वै । वै॒श्वा॒न॒रः॑ ।
विट् । म॒रु॒तः॑ । वै॒श्वा॒न॒र॒म् । हु॒त्वा । मा॒रु॒ता॒न् । जु॒हो॒ति॑ । रा॒ष्ट्रे॑ । ए॒व ।
वि॒श॒म्॑ । अ॒न्वि॒ति॑ । ब॒द्ध्ना॒ति॑ । उ॒च्चैः॑ । वै॒श्वा॒न॒र॒स्य॑ । ए॒ति॑ ।
श्रा॒व॒य॒ति॑ । उ॒पा॒ञ्चि॒त्यु॒प – अ॒ञ्शु॑ । मा॒रु॒ता॒न् । जु॒हो॒ति॑ । तस्मा॑त् ।
रा॒ष्ट्र॒म् । वि॒श॒म्॑ । अ॒ती॒ति॑ । व॒द॒ति॑ । मा॒रु॒ताः॑ । भ॒व॒न्ति॑ । म॒रु॒तः॑ । वै ।
दे॒वा॒ना॒म्॑ । वि॒शः॑ । दे॒व॒वि॒शे॒ने॒ति॑ दे॒व – वि॒शे॒न॑ । ए॒व । अ॒स्मै॑ ।
म॒नु॒ष्य॒वि॒श॒मि॒ति॑ म॒नु॒ष्य – वि॒श॒म् () । अ॒वे॒ति॑ । रु॒न्धे॑ । स॒प्त ।
भ॒व॒न्ति॑ । स॒प्त॒ग॒णा॒ इति॑ स॒प्त – ग॒णाः॑ । वै । म॒रु॒तः॑ । ग॒ण॒श॒ इति॑
ग॒ण – शः॑ । ए॒व । वि॒श॒म्॑ । अ॒वे॒ति॑ । रु॒न्धे॑ । ग॒णे॒न॑ । ग॒ण॒म् ।
अ॒नु॒द्रु॒त्ये॒त्यनु॑ – द्रु॒त्य॑ । जु॒हो॒ति॑ । वि॒श॒म्॑ । ए॒व । अ॒स्मै॑ ।
अ॒नु॒व॒र्त्मा॒न॒मि॒त्यनु॑ – व॒र्त्मा॒न॒म् । क॒रो॒ति॑ ॥ 36 (71)

(अग्ने॑ प्रेह्य॑ – व॑ – स्म॑ – दुहे॑ तां – प्र॒जाप॑तेः – सा॒क्षान् –
म॑नुष्य॒विश॑ – मे॒कवि॑शतिश्च॒ (A7)

TS 5.4.8.1

वसो॑र्द्धा॒रां जु॒होति॑ वसो॑र्मे॒ धारा॑ ऽस॒दिति॑ वा ए॒षा हू॑यते॒ घृत॑स्य॒
वा ए॒नमे॑षा॒ धारा॑ ऽमु॒ष्मिन् लो॒के पि॒न्वमा॑नोप॒ तिष्ठ॑त आ॒ज्येन॑
जु॒होति॑ तेजो॒ वा आ॒ज्यं तेजो॒ वसो॑र्द्धा॒रा तेज॑सै॒वास्मै॑ तेजो॒ ऽव
रु॒न्धे ऽथो॑ का॒मा वै वसो॑र्द्धा॒रा का॒माने॑वा॒व रु॒न्धे यं का॒मये॑त
प्रा॒णान॑स्यान्नाद्यं॒ वि- [] 37

TS 5.4.8.1 - Padam

वसोः॑ । धारा॑म् । जु॒होति॑ । वसोः॑ । मे॒ । धारा॑ । अ॒सत् । इति॑ । वै ।
ए॒षा । हू॑यते॒ । घृत॑स्य॒ । वै । ए॒नम् । ए॒षा । धारा॑ । अ॒मुष्मिन् ।
लो॒के । पि॒न्वमा॑ना । उ॒पेति॑ । तिष्ठ॑ते । आ॒ज्येन॑ । जु॒होति॑ । तेजः॑ ।
वै । आ॒ज्यम् । तेजः॑ । वसोः॑ । धारा॑ । तेज॑सा । ए॒व । अ॒स्मै ।
तेजः॑ । अ॒वेति॑ । रु॒न्धे । अथो॑ इति॑ । का॒माः । वै । वसोः॑ । धारा॑ ।
का॒मान् । ए॒व । अ॒वेति॑ । रु॒न्धे । यम् । का॒मये॑त ।

प्रा॒णानि॑ति॒ प्र – अ॒नान् । अ॒स्य । अ॒न्नाद्य॑मि॒त्यन्न॑ – अद्य॑म् ।

वी॒ति । 37 (50)

TS 5.4.8.2

छि॒न्द्यामि॑ति॒ वि॒ग्राहं॑ तस्य॑ जुहु॒यात् प्रा॒णाने॑वास्यान्नाद्यं॑ वि॒ छिन॑त्ति॒
यं का॒मये॑त प्रा॒णानस्यान्नाद्यं॑ सं तनु॒यामि॑ति॒ सन्त॑तां तस्य॑ जुहु॒यात्
प्रा॒णाने॑वास्यान्नाद्यं॑ सं तनो॑ति॒ द्वाद॑श द्वाद॑शानि॒ जुहो॑ति॒ द्वाद॑श
मा॒साः सँव॑त्सरः सँव॑त्सरेणैवास्मा॒ अन्न॑मव रुन्धे ऽन्नं॑ च
मे ऽक्षु॑च्च म॒ इत्या॑हैतद् वा – [] 38

TS 5.4.8.2 - Padam

छि॒न्द्याम् । इति॑ । वि॒ग्राह॑मि॒ति वि – ग्राह॑म् । तस्य॑ । जुहु॒यात् ।
प्रा॒णानि॑ति॒ प्र – अ॒नान् । ए॒व । अ॒स्य । अ॒न्नाद्य॑मि॒त्यन्न॑ – अद्य॑म् ।
वी॒ति । छि॒न॒त्ति । यम् । का॒मये॑त । प्रा॒णानि॑ति॒ प्र-अ॒नान् । अ॒स्य ।
अ॒न्नाद्य॑मि॒त्यन्न॑ – अद्य॑म् । समि॑ति । तनु॒याम् । इति॑ । सन्त॑तामि॒ति
सं – तता॑म् । तस्य॑ । जुहु॒यात् । प्रा॒णानि॑ति॒ प्र – अ॒नान् । ए॒व ।
अ॒स्य । अ॒न्नाद्य॑मि॒त्यन्न॑ – अद्य॑म् । समि॑ति । तनो॑ति । द्वाद॑श ।

द्वाद॒शानि॑ । जु॒होति॑ । द्वाद॒श । मा॒साः । सँ॒व॒थ्स॒र इति॑ सं-व॒थ्स॒रः ।
सँ॒व॒थ्स॒रेणेति॑ सं - व॒थ्स॒रेण॑ । ए॒व । अ॒स्मै । अ॒न्नम् । अ॒वेति॑ ।
रु॒न्धे । अ॒न्नम् । च॒ । मे॒ । अ॒क्षुत् । च॒ । मे॒ । इति॑ । आ॒ह ।
ए॒तत् । वै । 38 (50)

TS 5.4.8.3

अ॒न्नस्य॑ रू॒पम् । रू॒पेणै॒वान्न॑म॒व रु॒न्धे ऽग्नि॑श्च म॒ आप॑श्च म॒ इत्या॑हैषा
वा अ॒न्नस्य॑ यो॒निः स॒यो॒न्ये॒वान्न॑म॒व रु॒न्धे ऽर्धे॒न्द्राणि॑ जु॒होति॑ दे॒वता॑
ए॒वाव॑ रु॒न्धे यथ् सर्वे॑षा-म॒र्द्धमिन्द्रः॑ प्र॒ति तस्मा॑दिन्द्रो दे॒वता॑नां
भूयि॑ष्ठभा॒क्तम् इन्द्र॑मु॒त्तर-मा॑हेन्द्रि॒यमे॒वास्मि-न्नु॑परि॒ष्टाद् द॑धाति
य॒ज्ञायु॑धानि जु॒होति॑ य॒ज्ञो - [] 39

TS 5.4.8.3 - Padam

अ॒न्नस्य॑ । रू॒पम् । रू॒पेण॑ । ए॒व । अ॒न्नम् । अ॒वेति॑ । रु॒न्धे । अ॒ग्निः ।
च॒ । मे॒ । आ॒पः । च॒ । मे॒ । इति॑ । आ॒ह । ए॒षा । वै । अ॒न्नस्य॑ ।
यो॒निः । स॒यो॒नीति॑ स - यो॒नि । ए॒व । अ॒न्नम् । अ॒वेति॑ । रु॒न्धे ।
अ॒र्धे॒न्द्राणीत्य॑र्द्ध - इन्द्रा॑णि । जु॒होति॑ । दे॒वताः॑ । ए॒व । अ॒वेति॑ ।

रुन्धे॑ । यत् । सर्वे॑षाम् । अर्द्ध॑म् । इन्द्रः॑ । प्रतीति॑ । तस्मात्॑ ।
इन्द्रः॑ । देवता॑नाम् । भूयिष्ठ॑भाक्तम् इति॑ भूयिष्ठ॑भाक्-तमः॑ । इन्द्रम्॑ ।
उत्तर॑मित्युत्-तरम् । आ॒ह । इन्द्रि॑यम् । ए॒व । अस्मिन् । उपरि॑ष्ठात् ।
दधा॑ति । यज्ञा॑युधानीति॑ यज्ञ-आयु॑धानि । जुहो॑ति । यज्ञः । 39 (50)

TS 5.4.8.4

वै यज्ञा॑युधानि॑ यज्ञमे॒वाव रुन्धे॑ ऽथो॑ एतद्-वै यज्ञस्य॑ रूपं॑ रूपेणै॒व
यज्ञम॑व रुन्धे॑ ऽवभृ॑थश्च मे स्वगा॑कारश्च म इत्या॑ह स्वगा॑कृत्या
अग्नि॑श्च मे घर्म॑श्च म इत्या॑हैतद् वै ब्रह्म॑वर्चसस्य॑ रूपं॑ रूपेणै॒व
ब्रह्म॑वर्चस-म॒व रुन्धे॑ ऋक्च॑ मे साम॑ च म इत्या॑है - [] 40

TS 5.4.8.4 - Padam

वै । यज्ञा॑युधानीति॑ यज्ञ-आयु॑धानि । यज्ञम् । ए॒व । अवे॑ति । रुन्धे॑ ।
अथो॑ इति॑ । एतत् । वै । यज्ञस्य॑ । रूपम् । रूपेण॑ । ए॒व । यज्ञम् ।
अवे॑ति । रुन्धे॑ । अवभृ॑थ इत्यव - भृथः । च । मे ।
स्वगा॑कार इति॑ स्वगा - कारः । च । मे । इति॑ । आ॒ह ।
स्वगा॑कृत्या इति॑ स्वगा - कृत्यै । अग्निः । च । मे । घर्मः । च ।

मे॒ । इति॑ । आ॒ह । ए॒तत् । वै । ब्र॒ह्मव॑र्चसस्येति॑ ब्र॒ह्म – व॒र्चस॑स्य ।
रूप॑म् । रूपे॑ण । ए॒व । ब्र॒ह्मव॑र्चसमिति॑ ब्र॒ह्म – व॒र्चस॑म् । अवेति॑ ।
रु॒न्धे । ऋक् । च॒ । मे॒ । साम॑ । च॒ । मे॒ । इति॑ । आ॒ह । 40 (50)

TS 5.4.8.5

–तद् वै छ॒न्दसा॑ रूप॑ रूपे॑णैव छ॒न्दा॑स्यव रु॒न्धे गर्भा॑श्च मे
व॒थ्साश्च॑ म॒ इत्या॑हैतद् वै प॒शूना॑ रूप॑ रूपे॑णैव प॒शून्व
रु॒न्धे क॒ल्पान् जु॒होत्य॑क्लृ॒प्तस्य॑ क्लृ॒प्त्यै यु॒ग्मद॑युजे जु॒होति॑
मिथु॑नत्वायो॒ – त॒राव॑ती भवतो॒ऽभि॒क्रान्त्या॑ ए॒का च॑ मे तिस्र॑श्च
म॒ इत्या॑ह दे॒वछ॒न्दसं॑ वा ए॒का च॑ तिस्र॑श्च – [] 41

TS 5.4.8.5 - Padam

ए॒तत् । वै । छ॒न्दसा॑म् । रूप॑म् । रूपे॑ण । ए॒व । छ॒न्दा॑सि ।
अवेति॑ । रु॒न्धे । गर्भा॑ः । च॒ । मे॒ । व॒थ्साः । च॒ । मे॒ । इति॑ ।
आ॒ह । ए॒तत् । वै । प॒शूना॑म् । रूप॑म् । रूपे॑ण । ए॒व । प॒शून् ।
अवेति॑ । रु॒न्धे । क॒ल्पान् । जु॒होति॑ । अक्लृ॒प्तस्य॑ । क्लृ॒प्त्यै ।
यु॒ग्मद॑युजे इति॑ यु॒ग्मत् – अ॒युजे॑ । जु॒होति॑ ।

मि॒थु॒न॒त्वा॒ये॒ति॑ मि॒थु॒न – त्वा॒य । उ॒त्त॒रा॒व॒ती॑ इ॒त्यु॒त्त॒रा॒-व॒ती॑ । भ॒व॒तः॑ ।
अ॒भि॒क्रा॒न्त्या॑ इ॒त्य॒भि – क्रा॒न्त्यै॑ ॥ ए॒का । च । मे । ति॒स्रः । च । मे ।
इ॒ति॑ । आ॒ह । दे॒व॒छ॒न्द॒स॒मि॒ति॑ दे॒व – छ॒न्द॒स॒म् । वै ।

॥
ए॒का । च । ति॒स्रः । च । 41 (50)

TS 5.4.8.6

म॒नु॒ष्य॒छ॒न्द॒सं॑ च॒त॒स्र॒श्चा॒ष्टौ च॑ दे॒व॒छ॒न्द॒सं॑ चै॒व म॒नु॒ष्य॒छ॒न्द॒स॒ञ्चा॒व रु॒न्ध॑
आ त्र॒य॒स्त्रिं॒श॒तो जु॒हो॒ति॑ त्र॒य॒स्त्रिं॒श॒द्-वै॑ दे॒व॒ता॑ दे॒व॒ता॑ ए॒वा॒व
रु॒न्ध॑ आ ऽष्टा॒च॒त्वा॒रिं॒श॒तो जु॒हो॒-त्य॒ष्टा॒च॒त्वा॒रिं॒श॒द॒क्ष॒रा ज॒ग॒ती॑
जा॒ग॒ताः प॒श॒वो ज॒ग॒त्यै॒वा॒स्मै प॒शू॒न॒व रु॒न्धे वा॒ज॒श्च प्र॒स॒व॒श्चे॒ति द्वा॒द॒शं
जु॒हो॒ति॑ द्वा॒द॒श मा॒साः सँ॒व॒त्स॒रः सँ॒व॒त्स॒र ए॒व प्र॒ति ति॒ष्ठ॒ति ॥ 42

TS 5.4.8.6 - Padam

म॒नु॒ष्य॒छ॒न्द॒स॒मि॒ति॑ म॒नु॒ष्य – छ॒न्द॒स॒म् । च॒त॒स्रः॑ । च ।
अ॒ष्टौ । च । दे॒व॒छ॒न्द॒स॒मि॒ति॑ दे॒व – छ॒न्द॒स॒म् । च । ए॒व ।
म॒नु॒ष्य॒छ॒न्द॒स॒मि॒ति॑ म॒नु॒ष्य – छ॒न्द॒स॒म् । च । अ॒वे॒ति॑ । रु॒न्धे ।
ए॒ति॑ । त्र॒य॒स्त्रिं॒श॒त इ॒ति॑ त्र॒यः॑ – त्रिं॒श॒तः॑ । जु॒हो॒ति॑ ।

त्रयस्त्रिंशदिति त्रयः – त्रिंशत् । वै । देवताः । देवताः । एव ।
 अवेति । रुन्धे । एति । अष्टाचत्वारिंशत् इत्यष्टा – चत्वारिंशतः ।
 जुहोति । अष्टाचत्वारिंशदक्षरेत्यष्टाचत्वारिंशत्-अक्षरा । जगती ।
 जागताः । पशवः । जगत्या । एव । अस्मै । पशून् । अवेति ।
 रुन्धे । वाजः । च । प्रसव इति प्र-सवः । च । इति । द्वादशम् ।
 जुहोति । द्वादश । मासाः । सँवत्सर इति सं – वत्सरः ।
 सँवत्सर इति सं-वत्सरे । एव । प्रतीति । तिष्ठति ॥ 42 (49)

(वि – वै – यज्ञः-साम च म इत्याह – च तिस्र –

श्रैकान्तपञ्चाशच्च) (A8)

TS 5.4.9.1

अग्निर्देवेभ्यो ऽपाक्रामद्-भागधेयमिच्छमानस्तं देवा अब्रुवन्नुप
 न आ वर्तस्व हव्यं नो वहेति सो ऽब्रवीद्-वरं वृणौ मह्यमेव
 वाजप्रसवीयं जुहवन्निति तस्मादग्नये वाजप्रसवीयं जुह्वति
 यद्-वाजप्रसवीयं जुहोत्यग्निमेव तद्-भागधेयेन स-मर्द्धयत्यथो

अभिषे॑क ए॒वास्य॑ स चतु॑र्दशभिर्जु॑होति स॒प्त ग्रा॒म्या ओष॑धयः

सप्ता – [] 43

TS 5.4.9.1 - Padam

अ॒ग्निः । दे॒वेभ्यः॑ । अ॒पेति॑ । अ॒क्राम॑त् । भा॒गधे॑यमि॒ति भा॒ग-धे॑यम् ।
इ॒च्छ॒मा॒नः । तम् । दे॒वाः । अ॒ब्रु॒वन् । उ॒पेति॑ । नः । ए॒ति । व॒र्तस्व॑ ।
ह॒व्यम् । नः । व॒ह । इति॑ । सः । अ॒ब्रवी॑त् । व॒रम् । वृ॒णै । म॒ह्यम् ।
ए॒व । वा॒जप्र॑स॒वीय॑मि॒ति वा॒ज – प्र॒स॒वीय॑म् । जु॒ह॒वन् । इति॑ ।
तस्मा॑त् । अ॒ग्नये॑ । वा॒जप्र॑स॒वीय॑मि॒ति वा॒ज – प्र॒स॒वीय॑म् । जु॒ह्व॒ति ।
यत् । वा॒जप्र॑स॒वीय॑मि॒ति वा॒ज – प्र॒स॒वीय॑म् । जु॒होति॑ । अ॒ग्निम् ।
ए॒व । तत् । भा॒गधे॑येनेति॑ भा॒ग – धे॑येन । स॒मि॒ति । अ॒र्द्ध॒यति॑ ।
अथो॑ इति॑ । अ॒भिषे॑क इत्य॑भि – से॒कः । ए॒व । अ॒स्य । सः ।
चतु॑र्दशभि॒रिति॑ चतु॑र्दश – भिः । जु॒होति॑ । स॒प्त । ग्रा॒म्याः ।
ओष॑धयः । स॒प्त । 43 (50)

TS 5.4.9.2

–*ऽऽर॒ण्या उ॒भयी॑षाम॒वरु॑द्ध्य॒ अन्न॑स्यान्नस्य जुहोत्यन्नस्यान्नस्या–
वरु॑द्ध्य॒ औदु॑म्बरेण सु॒वेण॑ जुहोत्यूर्वा उदु॒म्बर॑ ऊर्गन्नमूर्जे॒वास्मा॑
ऊर्ज॑मन्नमव रुन्धे ऽग्निर्वै दे॒वाना॑–म॒भिषि॑क्तोऽग्निचिन्–म॒नुष्या॑णां
तस्मा॑दग्निचिद्–वर्ष॑ति न धावेदवरुद्ध॒ ह्यस्या॑–न्नमन्नमिव खलु॒ वै
वर्ष॑ ँयद्–धावे॑दन्नाद्याद्–धावेदु॒पावर्ते॑ता–न्नाद्यमेवा॒भ्यु॑ – [] 44

TS 5.4.9.2 - Padam

आ॒र॒ण्याः । उ॒भयी॑षाम् । अ॒वरु॑द्ध्य॒ इत्य॑व – रु॒द्ध्यै॒ ।
अ॒न्नस्या॑न्नस्येत्यन्नस्य – अ॒न्नस्य॒ । जु॒होति॑ ।
अ॒न्नस्या॑न्नस्येत्यन्नस्य – अ॒न्नस्य॒ । अ॒वरु॑द्ध्य॒ इत्य॑व – रु॒द्ध्यै॒ ।
औदु॑म्बरेण । सु॒वेण॑ । जु॒होति॑ । ऊर्क् । वै । उदु॑म्बरः । ऊर्क् ।
अ॒न्नम् । ऊ॒र्जा । ए॒व । अ॒स्मै । ऊ॒र्जम् । अ॒न्नम् । अ॒वेति॑ । रु॒न्धे॒ ।
अ॒ग्निः । वै । दे॒वाना॑म् । अ॒भिषि॑क्त इत्य॒भि – सि॒क्तः॒ ।
अ॒ग्निचि॑दित्य॒ग्नि – चि॒त् । म॒नुष्या॑णाम् । तस्मा॑त् ।
अ॒ग्निचि॑दित्य॒ग्नि – चि॒त् । वर्ष॑ति । न । धा॒वेत् ।

अ॒वरु॒द्धमि॒त्यव॑ – रु॒द्धम् । हि । अ॒स्य । अ॒न्नम् । अ॒न्नम् । इ॒व ।
खलु॑ । वै । व॒र्षम् । यत् । धा॒वेत् । अ॒न्नाद्या॒दित्य॑न्न – अ॒द्यात् ।
धा॒वेत् । उ॒पाव॑र्ते॒तेत्यु॑प – आ॒वर्ते॑त । अ॒न्नाद्य॒मि॒त्यन्न॑ – अ॒द्यम् ।
ए॒व । अ॒भीति॑ । 44 (50)

TS 5.4.9.3

–पा॒वर्ते॑ते न॒क्तोषा॑सेति कृ॒ष्णायै॑ श्वे॒तव॑त्सायै॒ पय॑सा जु॒होत्य॑है॒वास्मै॑
रा॒त्रिं प्र दा॑पयति रा॒त्रिया॑ ऽह॒–र॒होरा॑त्रे ए॒वास्मै॑ प्र॒त्ते का॑म॒मन्नाद्यं॑ दुहाते
राष्ट्र॑भृ॒तो जु॒होति॑ रा॒ष्ट्रमे॒वाव॑ रुन्धे षड्भि॒र्जुहो॑ति षड् वा ऋ॒तव॑ ऋ॒तुष्वे॒व
प्रति॑ तिष्ठति भु॒वन॑स्य प॒त इति॑ रथ॒मुखे॑ पञ्चाऽऽहु॒तीर्जु॑होति वज्रो॒ वै
रथो॑ वज्रे॒णैव॑ दि॒शो – [] 45

TS 5.4.9.3 - Padam

उ॒पाव॑र्ते॒त इत्यु॑प – आ॒वर्ते॑ते । न॒क्तोषा॑सा । इति॑ । कृ॒ष्णायै॑ ।
श्वे॒तव॑त्साया॒ इति॑ श्वे॒त – व॑त्सायै॒ पय॑सा । जु॒होति॑ । अ॒ह्ना । ए॒व ।
अ॒स्मै । रा॒त्रिम् । प्रेति॑ । दा॒पय॑ति । रा॒त्रिया॑ । अ॒हः ।
अ॒हो॒रा॒त्रे इत्य॑हः – रा॒त्रे । ए॒व । अ॒स्मै । प्र॒त्ते इति॑ । का॑मम् ।

अ॒न्नाद्य॒मित्य॑न्न – अ॒द्यम् । दु॒हा॒ते इति॑ । रा॒ष्ट्र॒भृ॒त इति॑ रा॒ष्ट्र – भृ॒तः ।
जु॒होति॑ । रा॒ष्ट्रम् । ए॒व । अ॒वेति॑ । रु॒न्धे । ष॒ड्भि॒रिति॑ षट् – भिः ।
जु॒होति॑ । षट् । वै । ऋ॒तवः॑ । ऋ॒तुषु॑ । ए॒व । प्र॒तीति॑ । ति॒ष्ठति॑ ।
भु॒वन॑स्य । प॒ते । इति॑ । रथ॒मुख॑ इति॑ रथ – मु॒खे । पञ्च॑ ।
आ॒हु॒तीरि॒त्या – हु॒तीः । जु॒होति॑ । वज्रः॑ । वै । रथः॑ । वज्र॑ण । ए॒व ।
दि॒शः । 45 (50)

TS 5.4.9.4

–ऽभि॑ जयत्यग्नि॒चित॑ ह॒ वा अ॒मुष्मिन्॑ लो॒के वा॒तोऽभि॑ पवते
वा॒तना॒मानि॑ जु॒होत्य॒भ्येवैन॑–म॒मुष्मिन्॑ लो॒के वा॒तः प॒वते त्री॑णि
जु॒होति॑ त्रय॑ इ॒मे लो॒का ए॒भ्य ए॒व लो॒केभ्यो॑ वा॒तम॒व रु॒न्धे स॒मुद्रो॑
ऽसि॑ नभ॒स्वानि॒त्याहै॒तद्–वै वा॒तस्य॑ रू॒पं रू॒पेणै॒व वा॒तम॒व रु॒न्धे
ऽज्ज॒लिना॑ जु॒होति॑ न ह्ये॒तेषा॑मन्यथा () ऽहु॒तिर॒वक॑ल्पते ॥ 46

TS 5.4.9.4 - Padam

अ॒भीति॑ । ज॒यति॑ । अ॒ग्नि॒चित॑मित्य॒ग्नि – चि॒तम् । ह॒ । वै ।
अ॒मुष्मिन्॑ । लो॒के । वा॒तः । अ॒भीति॑ । प॒वते॑ ।

वा॒तना॒मानी॑ति वा॒त – ना॒मानि॑ । जु॒होति॑ । अ॒भीति॑ । ए॒व । ए॒नम् ।
 अ॒मुष्मिन् । लो॒के । वा॒तः । प॒वते॑ । त्री॒णि । जु॒होति॑ । त्रयः॑ । इ॒मे ।
 लो॒काः । ए॒भ्यः । ए॒व । लो॒केभ्यः॑ । वा॒तम् । अ॒वेति॑ । रु॒न्धे ।
 स॒मुद्रः॑ । अ॒सि । न॒भस्वान् । इति॑ । आ॒ह । ए॒तत् । वै । वा॒तस्य॑ ।
 रू॒पम् । रू॒पेण॑ । ए॒व । वा॒तम् । अ॒वेति॑ । रु॒न्धे । अ॒ञ्जलि॑ना ।
 जु॒होति॑ । न । हि । ए॒तेषाम्॑ । अ॒न्यथा॑ () । आ॒हुति॑रि॒त्या – हु॒तिः ।
 अ॒वक॑ल्प॒त इत्य॑व – क॒ल्पते॑ ॥ 46 (52)

(ओष॑धयः स॒प्ता – भि॑ – दि॒शो – ऽन्य॑था – द्वे च॑) (A9)

TS 5.4.10.1

सु॒वर्गाय॑ वै लो॒काय॑ दे॒वर॑थो यु॒ज्यते॑ यत्रा॒कूताय॑ म॒नुष्य॑रथ ए॒ष खलु॑
 वै दे॒वर॑थो यद॒ग्निर॒ग्निं यु॑न॒ज्मि श॑वसा घृ॒तेने॑त्याह यु॒नक्त्ये॑वैनं॑ स
 ए॒नं यु॑क्तः सु॒वर्गं लो॒कम॒भि वह॑ति यथ् सर्वा॒भिः प॒ञ्चभि॑-
 र्यु॒ञ्ज्याद्-यु॒क्तोऽस्या॑ऽग्निः प्र॒च्युतः॑ स्यादप्रति॒ष्ठिता॑ आ॒हुत॑यः
 स्यु-रप्रति॒ष्ठिताः॑ स्तो॒मा अ॑प्रति॒ष्ठितान्यु॑क्थानि ति॒सृभिः॑
 प्रा॒तस्स॑वने॒ऽभि मृ॑शति त्रि॒वृ- [] 47

TS 5.4.10.1 - Padam

सु॒वर्गा॑येति॒ सुवः॑ – गा॒य॑ । वै । लो॒काय॑ । दे॒वर॑थ इति॒ देव॑ – र॒थः ।
यु॒ज्य॑ते । य॒त्राकू॑तायेति॒ यत्र॑ – आ॒कू॒ताय॑ । म॒नुष्य॑रथ इति॒
म॒नुष्य॑ – र॒थः । ए॒षः । ख॒लु । वै । दे॒वर॑थ इति॒ देव॑ – र॒थः । यत् ।
अ॒ग्निः । अ॒ग्नि॑म् । यु॒न॒ज्मि॑ । श॒व॒सा । घृ॒तेन॑ । इति॒ । आ॒ह॒ ।
यु॒न॒क्ति॑ । ए॒व । ए॒न॒म् । सः । ए॒न॒म् । यु॒क्तः ।
सु॒वर्ग॑मिति॒ सुवः॑-गम् । लो॒कम् । अ॒भी॒ति॑ । व॒ह॒ति॑ । यत् ।
सर्वा॑भिः । प॒ञ्च॑भि॒रिति॑ प॒ञ्च – भिः॑ । यु॒ज्ज्या॑त् । यु॒क्तः । अ॒स्य॑ ।
अ॒ग्निः । प्र॒च्यु॑त इति॒ प्र – च्यु॑तः । स्या॒त् । अ॒प्र॒ति॒ष्ठि॒ता
इ॒त्य॒प्र॒ति – स्थि॑ताः । आ॒हु॒त॒य॑ इ॒त्या – हु॒त॒यः॑ । स्युः॑ । अ॒प्र॒ति॒ष्ठि॒ता
इ॒त्य॒प्र॒ति – स्थि॑ताः । स्तो॒माः॑ । अ॒प्र॒ति॒ष्ठि॒तानी॑त्य॒प्र॒ति – स्थि॑तानि ।
उ॒क्थानि॑ । ति॒सृ॒भि॒रिति॑ ति॒सृ – भिः॑ । प्रा॒त॒स्स॒व॒न॑ इति॒
प्रा॒तः – स॒व॒ने । अ॒भी॒ति॑ । मृ॒श॒ति॑ । त्रि॒वृ॒दि॒ति॑ त्रि – वृ॒त् । 47 (50)

TS 5.4.10.2

–द्वा अ॒ग्निर्या॒वाने॒वा–ग्नि॒स्तं यु॑नक्ति॒ यथा॑ ऽन॒सि यु॒क्त आ॑धी॒यत॑
ए॒वमे॒व तत् प्र॒त्याहु॑तय॒स्तिष्ठ॑न्ति॒ प्रति॒ स्तोमाः॑ प्रत्यु॒क्थानि॑ य॒ज्ञाय॒ज्ञिय॑स्य
स्तो॒त्रे द्वा॒भ्याम॒भि मृ॑शत्ये॒तावान्॑. वै य॒ज्ञो या॒वानग्नि॑ष्टो॒मो भू॒मा त्वा
अ॒स्यात॑ ऊ॒र्ध्वः क्रि॑यते॒ यावा॑ने॒व य॒ज्ञ–स्त–म॑न्त॒तो ऽन्वा॑रो॒हति॒ द्वा॒भ्यां
प्रति॑ष्ठित्या॒ एक॒याऽप्र॑स्तु॒तं भव॑त्यथा– [] 48

TS 5.4.10.2 - Padam

वै । अ॒ग्निः । या॒वान् । ए॒व । अ॒ग्निः । तम् । यु॒नक्ति॑ । यथा॑ ।
अ॒न॒सि । यु॒क्ते । आ॒धी॒यत॑ इत्या॑ – धी॒यते॑ । ए॒वम् । ए॒व । तत् ।
प्रती॑ति । आ॒हु॒तय॑ इत्या॑ – हु॒तयः॑ । तिष्ठ॑न्ति । प्रती॑ति । स्तो॒माः ।
प्रती॑ति । उ॒क्थानि॑ । य॒ज्ञाय॒ज्ञिय॑स्य । स्तो॒त्रे । द्वा॒भ्याम् ।
अ॒भीति॑ । मृ॒शति॑ । ए॒तावान्॑ । वै । य॒ज्ञः । या॒वान् ।
अ॒ग्नि॒ष्टोम॑ इत्य॒ग्नि – स्तो॒मः । भू॒मा । तु । वै । अ॒स्य । अ॒तः ।
ऊ॒र्ध्वः । क्रि॑यते । या॒वान् । ए॒व । य॒ज्ञः । तम् । अ॒न्ततः॑ ।
अ॒न्वा॒रो॒हती॑त्यनु॒ – आ॒रो॒हति॑ । द्वा॒भ्याम् ।

प्रति॑ष्ठित्या॒ इति॑ प्रति॑ – स्थि॒त्यै॑ । ए॒कया॑ । अ॒प्र॒स्तु॒तमि॒त्यप्र॑-स्तु॒तम् ।
भ॒वति॑ । अथ॑ । 48 (50)

TS 5.4.10.3

-भि॑ मृ॒शत्यु॑पै॒नमु॑त्तरो॒ यज्ञो॑ न॒मत्य॑थो स॒न्तत्यै॑ प्र वा
ए॒षो ऽस्मा॑-ल्लो॒काच्च्य॑वते॒ यो ऽग्निं॑ चि॒नुते॑ न वा ए॒तस्या॑नि॒ष्टक
आहु॑तिर॒व क॑ल्पते॒ यां वा॑ ए॒षो ऽनि॑ष्टक आहु॑तिं जु॒होति॑ स्र॒वति॑ वै
सा ता॑ स्र॒वन्तीं॑ य॒ज्ञो ऽनु॑ परा॒ भवति॑ य॒ज्ञं य॑ज॒मानो॑ यत् पु॒नश्चि॑तिं
चि॒नुत॑ आहु॑तीनां॒ प्रति॑ष्ठित्यै॒ प्रत्याहु॑तय॒ स्तिष्ठ॑न्ति- [] 49

TS 5.4.10.3 - Padam

अ॒भीति॑ । मृ॒शति॑ । उ॒पेति॑ । ए॒नम् । उ॒त्तर॑ इत्युत् - त॒रः । य॒ज्ञः ।
न॒मति॑ । अथो॒ इति॑ । स॒न्तत्या॑ इति॒ सं - त॒त्यै । प्रेति॑ । वै । ए॒षः ।
अ॒स्मात् । लो॒कात् । च्य॑वते । यः । अ॒ग्निम् । चि॒नुते॑ । न । वै ।
ए॒तस्य॑ । अ॒नि॒ष्टके॑ । आहु॑तिरि॒त्या - हु॒तिः । अ॒वेति॑ । क॒ल्पते॑ ।
या॒म् । वै । ए॒षः । अ॒नि॒ष्टके॑ । आहु॑तिमि॒त्या - हु॒तिम् । जु॒होति॑ ।
स्र॒वति॑ । वै । सा । ता॒म् । स्र॒वन्ती॑म् । य॒ज्ञः । अ॒नु । परेति॑ ।

भवति । य॒ज्ञम् । य॒ज॒मा॒नः । यत् । पु॒न॒श्चि॒तिमि॒ति पु॒नः – चि॒तिम् ।
चि॒नु॒ते । आ॒हु॒ती॒ना॒मि॒त्या-हु॒ती॒ना॒म् । प्र॒ति॒ष्ठि॒त्या इति॒ प्र॒ति-स्थि॒त्यै ।
प्र॒ती॒ति । आ॒हु॒त॒य इ॒त्या – हु॒त॒यः । तिष्ठ॑न्ति । 49 (50)

TS 5.4.10.4

न य॒ज्ञः प॒रा॒भ॒व॒ति न य॒ज॒मा॒नो ऽष्टा॒वुप॑ द॒धा॒त्य॒ष्टाक्ष॑रा गाय॒त्री
गा॒य॒त्रेणै॒वैनं॑ छ॒न्द॒सा चि॒नु॒ते य॒दे॒का॒द॒श त्रै॒ष्टु॒भेन॑ यद् द्वा॒द॒श
जा॒ग॒तेन॑ छ॒न्दो॒भिरे॒वैनं॑ चि॒नु॒ते न॒पा॒त्को वै ना॒मैषो॑ऽग्नि॒र्यत् पु॒न॒श्चि॒तिर्य
ए॒वं वि॒द्वान् पु॒न॒श्चि॒तिं चि॒नु॒त आ तृ॒तीया॒त् पु॒रु॒षा॒दन्न॑म॒त्ति
य॒था वै पु॒न॒रा॒धेय॑ ए॒वं पु॒न॒श्चि॒तिर्यो॑ऽग्न्या॒धेये॑न न- [] 50

TS 5.4.10.4 - Padam

न । य॒ज्ञः । प॒रा॒भ॒व॒तीति॑ प॒रा – भ॒व॒ति । न । य॒ज॒मा॒नः । अ॒ष्टौ ।
उ॒पेति॑ । द॒धा॒ति । अ॒ष्टाक्ष॑रेत्य॒ष्टा – अ॒क्ष॒रा । गा॒य॒त्री । गा॒य॒त्रेण॑ ।
ए॒व । ए॒नम् । छ॒न्द॒सा । चि॒नु॒ते । यत् । ए॒का॒द॒श । त्रै॒ष्टु॒भेन॑ । यत् ।
द्वा॒द॒श । जा॒ग॒तेन॑ । छ॒न्दो॒भिरि॒ति छ॒न्दः – भिः॑ । ए॒व । ए॒नम् ।
चि॒नु॒ते । न॒पा॒त्कः । वै । ना॒म । ए॒षः । अ॒ग्निः । यत् ।

पुनश्चि॒तिरि॒ति पुनः॑ – चि॒तिः । यः । ए॒वम् । वि॒द्वान् । पुनश्चि॒तिमि॒ति
पुनः॑ – चि॒तिम् । चि॒नुते॑ । ए॒ति । तृ॒तीया॑त् । पु॒रुषा॑त् । अ॒न्नम् ।
अ॒त्ति । यथा॑ । वै । पु॒नरा॒धेय॑ इति पुनः॑ – आ॒धेयः॑ । ए॒वम् ।
पुनश्चि॒तिरि॒ति पुनः॑ – चि॒तिः । यः । अ॒ग्न्या॒धेये॒नेत्य॑ग्नि-आ॒धेये॑न ।

न । 50 (50)

TS 5.4.10.5

ध्नो॑ति स पु॒नरा॒धेय॑मा ध॒त्ते यो॑ ऽग्निं चि॒त्वा नर्द॑ध्नोति स पु॒नश्चि॒तिं
चि॒नुते॑ यत् पु॒नश्चि॒तिं चि॒नुत॑ ऋ॒द्ध्या अ॒थो ख॒ल्वाहु॑र्न चे॒तव्ये॑ति रु॒द्रो
वा ए॒ष यद॑ग्निर्यथा॑ व्याघ्र॑ सु॒प्तं बो॒धय॑ति तादृ॒गेव॑ तदथो
ख॒ल्वाहु॑श्चे॒तव्ये॑ति यथा॑ वसी॒याँसं॑ भा॒गधे॑येन बो॒धय॑ति तादृ॒गेव॑
तन्म॑नु-र॒ग्नि-म॑चि॒नुत॑ () तेन॑ नाऽऽर्द॑ध्नो॒त्स ए॒तां पु॒नश्चि॒तिम॑पश्यत्
ताम॑चि॒नुत॑ तया॑ वै स आ॒र्दध्नो॑द्-यत् पु॒नश्चि॒तिं चि॒नुत॑ ऋ॒द्ध्यै॑ ॥ 51

TS 5.4.10.5 - Padam

ऋ॒ध्नोति॑ । सः । पु॒नरा॒धेय॑मि॒ति पुनः॑-आ॒धेय॑म् । ए॒ति । ध॒त्ते । यः ।
अ॒ग्निम् । चि॒त्वा । न । ऋ॒ध्नोति॑ । सः ।

पुनश्चि॒तिमि॑ति पुनः – चि॒तिम् । चि॒नुते॑ । यत् । पुनश्चि॒तिमि॑ति
पुनः – चि॒तिम् । चि॒नुते॑ । ऋ॒द्ध्यै॑ ॥ अथो॒ इति॑ । खलु॑ । आ॒हुः ।
न । चे॒तव्या॑ ॥ इति॑ । रु॒द्रः । वै । ए॒षः । यत् । अ॒ग्निः । यथा॑ ।
व्याघ्र॑म् । सु॒प्तम् । बो॒धय॑ति । ता॒दृक् । ए॒व । तत् । अथो॒ इति॑ ।
खलु॑ । आ॒हुः । चे॒तव्या॑ ॥ इति॑ । यथा॑ । वसी॑या॒ऽसम् । भा॒गधे॑येनेति
भा॒ग – धे॑येन । बो॒धय॑ति । ता॒दृक् । ए॒व । तत् । म॒नुः । अ॒ग्निम् ।
अ॒चि॒नुत॑ () । तेन॑ । न । आ॒र्द्ध॒नोत् । सः । ए॒ताम् । पुनश्चि॒तिमि॑ति
पुनः – चि॒तिम् । अ॒पश्य॑त् । ता॒म् । अ॒चि॒नुत॑ । तया॑ ॥ वै । सः ।
आ॒र्द्ध॒नोत् । यत् । पुनश्चि॒तिमि॑ति पुनः – चि॒तिम् । चि॒नुते॑ ।
ऋ॒द्ध्यै॑ ॥ 51 (67)

(त्रि॒वृ-द॒थ-तिष्ठ॑-न्त्यग्न्या॒धेये॑न ना-चि॒नुत॑-स॒प्तद॑श- च) (A10)

TS 5.4.11.1

छ॒न्दश्चि॑तं चि॒न्वीत॑ प॒शुकामः॑ प॒शवो॑ वै छ॒न्दा॒ऽसि॑ प॒शुमा॑नेव भवति
श्ये॒नचि॑तं चि॒न्वीत॑ सु॒वर्ग॑कामः श्ये॒नो वै वय॑सां पतिष्ठः श्ये॒न ए॒व
भू॒त्वा सु॒वर्गं॑ लो॒कं प॑तति कङ्क॒चितं॑ चि॒न्वीत॑ यः का॒मये॑त

शीर्॒ष॒ण्वान॒मुष्मिन्॑ ँ॒लो॒के स्या॒मि॒ति शीर्॒ष॒ण्वाने॒वाऽमुष्मिन्॑ ँ॒लो॒के
भव॒त्यल॒ज॒चितं॑ चिन्वी॒त चतु॑स्सी॒तं प्रति॒ष्ठाका॒म श्र॒त॒स्रो दि॒शो दि॒क्ष्वे॒व
प्रति॑ तिष्ठति प्रउ॒ग॒चितं॑ चिन्वी॒त भ्रातृ॑व्य॒वान् प्रै- [] 52

TS 5.4.11.1 - Padam

छ॒न्दश्चि॒तमि॒ति छ॒न्दः - चि॒तम् । चि॒न्वी॒त । प॒शुका॒म इति॑
प॒शु - का॒मः । प॒शवः॑ । वै । छ॒न्दा॒सि । प॒शुमा॒निति॑ प॒शु-मा॒न् ।
ए॒व । भ॒वति॑ । श्ये॒नचि॒तमि॒ति श्ये॒न - चि॒तम् । चि॒न्वी॒त ।
सु॒वर्ग॒का॒म इति॑ सु॒वर्ग - का॒मः । श्ये॒नः । वै । व॒य॒साम् । प॒तिष्ठः॑ ।
श्ये॒नः । ए॒व । भू॒त्वा । सु॒वर्ग॒मिति॑ सु॒वः - ग॒म् । लो॒कम् । प॒तति॑ ।
क॒ङ्क॒चि॒तमि॒ति क॒ङ्क - चि॒तम् । चि॒न्वी॒त । यः । का॒मये॑त ।
शीर्॒ष॒ण्वानि॒ति शीर्॒ष॒ण् - वा॒न् । अ॒मुष्मि॒न् । लो॒के । स्या॒म् ।
इति॑ । शीर्॒ष॒ण्वानि॒ति शीर्॒ष॒ण् - वा॒न् । ए॒व । अ॒मुष्मि॒न् । लो॒के ।
भ॒वति॑ । अ॒ल॒ज॒चि॒तमि॒त्यल॒ज - चि॒तम् । चि॒न्वी॒त ।
चतु॑स्सी॒तमि॒ति चतुः॑ - सी॒तम् । प्रति॒ष्ठाका॒म इति॑ प्रति॒ष्ठा-का॒मः ।
च॒त॒स्रः । दि॒शः । दि॒क्षु । ए॒व । प्र॒तीति॑ । तिष्ठ॒ति । प्रउ॒ग॒चि॒तमि॒ति

प्र॒उ॒ग – चि॒तम् । चि॒न्वी॒त । भ्रा॒तृ॒व्य॒वा॒नि॒ति॒ भ्रा॒तृ॒व्य – वा॒न् ।

प्रे॒ति । 52 (50)

TS 5.4.11.2

–व॒ भ्रा॒तृ॒व्यान् नु॒द॒त उ॒भ॒य॒तःप्र॒उ॒गं चि॒न्वी॒त यः का॒म॒ये॒त प्र जा॒ता॒न्
भ्रा॒तृ॒व्यान् नु॒दे॒य प्र॒ति ज॒नि॒ष्य॒मा॒णा॒नि॒ति॒ प्रै॒व जा॒ता॒न् भ्रा॒तृ॒व्यान् नु॒द॒ते
प्र॒ति ज॒नि॒ष्य॒मा॒णा॒न् रथ॒च॒क्र॒चि॒तं चि॒न्वी॒त भ्रा॒तृ॒व्य॒वा॒न् वज्रो॒ वै रथो॒
वज्र॒मे॒व भ्रा॒तृ॒व्ये॒भ्यः प्र॒ हर॒ति द्रो॒ण॒चि॒तं चि॒न्वी॒ता॒न्न॒का॒मो द्रो॒णे वा
अ॒न्नं भ्रि॒य॒ते स॒यो॒न्ये॒वा॒न्न॒म॒व रु॒न्धे स॒मू॒ह्यं चि॒न्वी॒त प॒शु॒का॒मः

प॒शु॒मा॒ने॒व भ॒व॒ति – [] 53

TS 5.4.11.2 - Padam

ए॒व । भ्रा॒तृ॒व्यान् । नु॒द॒ते । उ॒भ॒य॒तःप्र॒उ॒ग॒मि॒त्यु॒भ॒य॒तः – प्र॒उ॒गम् ।
चि॒न्वी॒त । यः । का॒म॒ये॒त । प्रे॒ति । जा॒ता॒न् । भ्रा॒तृ॒व्यान् । नु॒दे॒य ।
प्र॒ती॒ति । ज॒नि॒ष्य॒मा॒णा॒न् । इ॒ति । प्रे॒ति । ए॒व । जा॒ता॒न् । भ्रा॒तृ॒व्यान् ।
नु॒द॒ते । प्र॒ती॒ति । ज॒नि॒ष्य॒मा॒णा॒न् । रथ॒च॒क्र॒चि॒त॒मि॒ति॒
रथ॒च॒क्र – चि॒तम् । चि॒न्वी॒त । भ्रा॒तृ॒व्य॒वा॒नि॒ति॒ भ्रा॒तृ॒व्य – वा॒न् ।

वज्रः । वै । रथः । वज्रम् । एव । भ्रातृव्येभ्यः । प्रेति । हरति ।
द्रोणचितमिति द्रोण – चितम् । चिन्वीत । अन्नकाम इत्यन्न-कामः ।
द्रोणे । वै । अन्नम् । भ्रियते । सयोनीति स-योनि । एव । अन्नम् ।
अवेति । रुन्धे । समूह्यमिति सं – ऊह्यम् । चिन्वीत । पशुकाम इति
पशु – कामः । पशुमानिति पशु – मान् । एव । भवति । 53 (50)

TS 5.4.11.3

परिचाय्यं चिन्वीत ग्रामकामो ग्राम्येव भवति श्मशानचितं चिन्वीत
यः कामयेत पितृलोक ऋद्ध्युयामिति पितृलोक एवर्द्धनोति
विश्वामित्रजमदग्नी वसिष्ठेना ऽस्पर्द्धेताꣳ स एता जमदग्निर्विहव्या
अपश्यत् ता उपाधत्त ताभिर्वै स वसिष्ठस्येन्द्रियं वीर्यमवृद्ध यद्-
विहव्या उपदधातीन्द्रियमेव ताभिर्वीर्यं यजमानो भ्रातृव्यस्य वृद्धे
होतुर्दधिष्णिय उप दधाति यजमानायतनं वै- [] 54

TS 5.4.11.3 - Padam

परिचाय्यमिति परि – चाय्यम् । चिन्वीत । ग्रामकाम इति
ग्राम – कामः । ग्रामी । एव । भवति । श्मशानचितमिति

श्म॒शान॑ – चि॒तम् । चि॒न्वी॒त । यः । का॒मये॑त । पि॒तृ॒लो॒क इति॑
 पि॒तृ – लो॒के । ऋ॒द्ध्नु॒याम् । इति॑ । पि॒तृ॒लो॒क इति॑ पि॒तृ – लो॒के ।
 ए॒व । ऋ॒द्ध्नो॒ति । वि॒श्वा॒मि॒त्रज॑मदग्नी इति॑ वि॒श्वा॒मि॒त्र – ज॒मद॑ग्नी ।
 वसि॑ष्ठेन । अ॒स्प॒र्द्धे॒ताम् । सः । ए॒ताः । ज॒मद॑ग्निः । वि॒ह॒व्या इति॑
 वि – ह॒व्याः । अ॒प॒श्यत् । ताः । उ॒पेति॑ । अ॒ध॒त्त । ताभिः॑ । वै ।
 सः । वसि॑ष्ठस्य । इ॒न्द्रि॒यम् । वी॒र्य॑म् । अ॒वृ॒ङ्क । यत् । वि॒ह॒व्या इति॑
 वि – ह॒व्याः । उ॒प॒द॒धा॒तीत्यु॑प – द॒धा॒ति । इ॒न्द्रि॒यम् । ए॒व । ताभिः॑ ।
 वी॒र्य॑म् । यज॑मानः । भ्रा॒तृ॒व्यस्य॑ । वृ॒ङ्के । हो॒तुः । धि॒ष्णि॒ये । उ॒पेति॑ ।
 द॒धा॒ति । यज॑मानायतनमिति॑ यज॑मान – आ॒य॒त॒नम् । वै । 54 (50)

TS 5.4.11.4

हो॒ता स्व॑ ए॒वास्मा॑ आ॒य॒त॒न इ॒न्द्रि॒यं वी॒र्य॑मव रु॒न्धे द्वा॒द॒शो॒प द॒धा॒ति
 द्वा॒द॒शा॒क्ष॒रा ज॒गती॑ जा॒गताः॑ प॒श॒वो ज॒ग॒त्यै॒वास्मै॑ प॒शू॒नव॑ रु॒न्धे
 ऽष्टा॑व॒ष्टाव॑न्येषु धि॒ष्णि॒येषू॑प द॒धा॒त्य॒ष्टा॒श॒फाः प॒श॒वः प॒शू॒ने॒वाव॑ रु॒न्धे
 ष॒ण्मा॒र्जा॒ली॒ये ष॒ड् वा ऋ॒तव॑ ऋ॒तवः॑ ख॒लु वै दे॒वाः पि॒तर॑ ऋ॒तू॒ने॒व
 दे॒वान् पि॒तृन् प्री॑णाति ॥ 55

TS 5.4.11.4 - Padam

हो॒ता॑ । स्वे॑ । ए॒व । अ॒स्मै॑ । आ॒य॒त॒न॒ इ॒त्या॑ – य॒त॒ने॑ । इ॒न्द्रि॒य॒म् ।
वी॒र्य॑म् । अ॒वे॒ति॑ । रु॒न्धे॑ । द्वा॒द॒श॑ । उ॒पे॒ति॑ । द॒धा॒ति॑ । द्वा॒द॒शा॒क्ष॒रे॒ति॑
द्वा॒द॒श॑ – अ॒क्ष॒रा॑ । ज॒ग॒ती॑ । जा॒ग॒ताः॑ । प॒श॒वः॑ । ज॒ग॒त्या॑ । ए॒व ।
अ॒स्मै॑ । प॒शून् । अ॒वे॒ति॑ । रु॒न्धे॑ । अ॒ष्टा॒व॒ष्टा॒वि॒त्य॒ष्टौ॑ – अ॒ष्टौ॑ । अ॒न्ये॒षु॑ ।
धि॒ष्णि॒ये॒षु॑ । उ॒पे॒ति॑ । द॒धा॒ति॑ । अ॒ष्टा॒श॒फा॑ इ॒त्य॒ष्टा॑ – श॒फाः॑ ।
प॒श॒वः॑ । प॒शून् । ए॒व । अ॒वे॒ति॑ । रु॒न्धे॑ । ष॒ट् । मा॒र्जा॒ली॒यै॑ । ष॒ट् ।
वै । ऋ॒त॒वः॑ । ऋ॒त॒वः॑ । ख॒लु॑ । वै । दे॒वाः॑ । पि॒तरः॑ । ऋ॒तून् । ए॒व ।
दे॒वान् । पि॒तृन् । प्री॒णा॒ति॑ ॥ 55 (48)

(प्र – भ॒व॒ति॑ – य॒ज॒मा॒ना॒य॒त॒नं॑ – अ॒ष्टा॒च॒त्वा॒रि॒श॒च्च॑) (A11)

TS 5.4.12.1

प॒व॒स्व॒ वा॒ज॒सा॒त॒य॒ इ॒त्य॒नु॒ष्टु॒क् प्र॒ति॒प॒द्-भ॒व॒ति॑ ति॒स्रो॑ ऽनु॒ष्टु॒भ॒ श्र॒त॒स्रो॑
गा॒य॒त्रि॒यो॒ यत् ति॒स्रो॑ ऽनु॒ष्टु॒भ॒-स्त॒स्मा॒-द॒श्व॑-स्त्रि॒भि॒स्ति॒ष्ठ॑ स्ति॒ष्ठ॒ति॑
य॒च्च॒त॒स्रो॑ गा॒य॒त्रि॒य॒ स्त॒स्मा॒त् सर्वा॑ श्र॒तु॒रः॑ प॒दः॑ प्र॒ति॒द॒ध॒त् प॒ला॒य॒ते॑
प॒र॒मा॒ वा॒ ए॒षा॒ छ॒न्द॒सां॑ य॒द॒नु॒ष्टु॒क् प॒र॒म॒श्च॒तु॒ष्टो॒मः॑ स्तो॒मा॒नां॑

पर॒मस्त्रि॑रा॒त्रो य॒ज्ञानां॑ पर॒मोऽश्वः॑ प॒शूनां॑ पर॒मेणै॒वैनं॑ पर॒मतां॑
गम॑यत्येकवि॒ंश-म॑हर्भवति - [] 56

TS 5.4.12.1 - Padam

पव॑स्व । वाज॑सातय इति वाज॑ - सा॒तये॑ । इति॑ ।
अनु॑ष्टुगित्यनु - स्तुक् । प्र॒तिप॑दिति प्रति - पत् । भव॑ति । ति॒स्रः ।
अनु॑ष्टुभ इत्यनु - स्तुभः । चत॑स्रः । गा॒यत्रि॑यः । यत् । ति॒स्रः ।
अनु॑ष्टुभ इत्यनु - स्तुभः । तस्मा॑त् । अश्वः । त्रि॒भिरि॑ति त्रि-भिः ।
तिष्ठ॑न् । तिष्ठ॑ति । यत् । चत॑स्रः । गा॒यत्रि॑यः । तस्मा॑त् । सर्वा॑न् ।
चतु॑रः । पदः । प्र॒तिद॑धदिति प्रति - दधत् । पला॑यते । पर॒मा । वै ।
एषा॑ । छन्द॑साम् । यत् । अनु॑ष्टुगित्यनु - स्तुक् । पर॒मः ।
चतु॑ष्टोम इति चतुः - स्तोमः । स्तोमा॑नाम् । पर॒मः । त्रि॒रात्र॑ इति
त्रि-रा॑त्रः । य॒ज्ञाना॑म् । पर॒मः । अश्वः । प॒शूना॑म् । पर॒मेण॑ । ए॒व ।
ए॒नम् । पर॒मता॑म् । गम॑यति । ए॒कवि॑ंशमित्येक - वि॒ंशम् ।
अहः॑ । भव॑ति । 56 (50)

TS 5.4.12.2

यस्मिन्ना॑श्च आ॒ल॒भ्य॒ते॒ द्वा॒द॒श॒ मा॒साः॑ प॒ञ्च॒र्त॒व॒स्त्रय॑ इ॒मे लो॒का
अ॒सा॒वा॒दि॒त्य॒ ए॒क॒वि॒ं॒श॒ ए॒ष प्र॒जा॒प॒तिः॑ प्रा॒जा॒प॒त्यो ऽश्व॒स्तमे॒व
सा॒क्षाद्द॒ध्नो॒ति॒ श॒क्व॒रयः॑ पृ॒ष्ठं भ॒वन्त्य॒न्यद॒न्य॒-च्छ॒न्दोऽन्ये॑न्ये वा
ए॒ते प॒श॒व आ ल॒भ्यन्त॑ उ॒ते॒व ग्रा॒म्या उ॒ते॒वाऽऽर॒ण्या यच्छ॒क्व॒रयः॑
पृ॒ष्ठं भ॒वन्त्य॒श्वस्य॑ स॒र्व॒त्वाय॑ पा॒र्थुर॒श्मं ब्र॒ह्म॒सामं॑ भ॒वति॒ र॒श्मिना॑
वा अ॒श्वो - [] 57

TS 5.4.12.2 - Padam

यस्मिन् । अ॒श्वः । आ॒ल॒भ्य॒त इ॒त्या - ल॒भ्य॒ते॒ । द्वा॒द॒श । मा॒साः ।
प॒ञ्च । ऋ॒त॒वः । त्रयः । इ॒मे । लो॒काः । अ॒सौ । आ॒दि॒त्यः ।
ए॒क॒वि॒ं॒श इ॒त्ये॒क - वि॒ं॒शः । ए॒षः । प्र॒जा॒प॒तिरि॒ति प्र॒जा-प॒तिः ।
प्रा॒जा॒प॒त्य इ॒ति प्रा॒जा - प॒त्यः । अ॒श्वः । तम् । ए॒व ।
सा॒क्षादि॒ति स - अ॒क्षात् । ऋ॒द्द॒ध्नो॒ति । श॒क्व॒रयः । पृ॒ष्ठम् ।
भ॒वन्ति॑ । अ॒न्यद॒न्यदि॒त्यन्य॑त् - अ॒न्यत् । छ॒न्दः ।
अ॒न्ये॒न्य इ॒त्यन्ये॑ - अ॒न्ये । वै । ए॒ते । प॒श॒वः । ए॒ति । ल॒भ्यन्ते॑ ।

उ॒त । इ॒व । ग्रा॒म्याः । उ॒त । इ॒व । आ॒र॒ण्याः । य॒त् । श॒क्व॒र॒यः ।
पृ॒ष्ठम् । भ॒व॒न्ति । अ॒श्व॒स्य । स॒र्व॒त्वा॒येति॑ स॒र्व – त्वा॒य ।
पा॒र्थु॒र॒श्म॒मि॒ति॑ पा॒र्थु – र॒श्म॒म् । ब्र॒ह्म॒सा॒म॒मि॒ति॑ ब्र॒ह्म – सा॒म॒म् ।
भ॒व॒ति । र॒श्मि॒ना ॥ वै । अ॒श्वः । 57 (50)

TS 5.4.12.3

य॒त ई॒श्व॒रो वा अ॒श्वो ऽय॒तो ऽप्र॑ति॒ष्ठि॒तः प॒रां प॒रा॒व॒तं ग॒न्तो॒र्य॒त्
पा॒र्थु॒र॒श्मं ब्र॒ह्म॒सा॒मं भ॒व॒त्य॒श्व॒स्य य॒त्यै धृ॒त्यै सं॒कृ॒त्य॒च्छा॒वा॒क॒सा॒मं
भ॒व॒त्यु॒त्स॒न्न॒य॒ज्ञो वा ए॒ष य॒द॒श्व॒मे॒धः क स्त॒द्-वे॒दे॒त्या॒हु॒र्य॒दि स॒र्वो वा
क्रि॒य॒ते न वा स॒र्व इति॑ य॒थ् सं॒कृ॒त्य॒च्छा॒वा॒क॒सा॒मं भ॒व॒त्य॒श्व॒स्य
स॒र्व॒त्वा॒य प॒र्या॒प्त्या अ॒न॒न्त॒रा॒या॒य स॒र्व॒स्तो॒मो ऽति॒रा॒त्र उ॒त्त॒म॒म॒हर्भ॑व॒ति
() स॒र्व॒स्या॒ऽऽप॒त्यै स॒र्व॒स्य जि॒त्यै स॒र्व॒मे॒व तेना॑ऽऽ॒प्नो॒ति
स॒र्वं ज॑य॒ति ॥ 58

TS 5.4.12.3 - Padam

य॒तः । ई॒श्व॒रः । वै । अ॒श्वः । अ॒य॒तः । अ॒प्र॑ति॒ष्ठि॒त इ॒त्य॒प्र॒ति-स्थि॑तः ।
प॒रा॒म् । प॒रा॒व॒त॒मि॒ति॑ प॒रा – व॒त॒म् । ग॒न्तोः॑ । य॒त् ।

पार्थुर॑श्ममि॒ति पार्थु॑ – र॒श्मम् । ब्र॒ह्मसा॒ममि॒ति ब्र॒ह्म – सा॒मम् ।
भ॒वति॑ । अ॒श्वस्य॑ । य॒त्यै॑ । धृ॒त्यै॑ । सं॒कृ॒तीति॑ सं – कृ॒ति ।
अ॒च्छावा॒कसा॒ममि॒त्यच्छा॒वाक॑ – सा॒मम् । भ॒वति॑ । उ॒थ्सन्न॑य॒ज्ञ
इ॒त्यु॒थ्सन्न॑ – य॒ज्ञः । वै । ए॒षः । यत् । अ॒श्वमे॒ध इ॒त्यश्व॑ – मे॒धः ।
कः । तत् । वे॒द । इति॑ । आ॒हुः । यदि॑ । स॒र्वः । वा । क्रि॒यते॑ । न ।
वा । स॒र्वः । इति॑ । यत् । सं॒कृ॒तीति॑ सं – कृ॒ति ।
अ॒च्छावा॒कसा॒ममि॒त्यच्छा॒वाक॑ – सा॒मम् । भ॒वति॑ । अ॒श्वस्य॑ ।
स॒र्वत्वा॒येति॑ स॒र्व – त्वा॒य । पर्या॑प्त्या इति॑ परि – आ॒प्त्यै॑ ।
अ॒नन्त॑रा॒याये॒त्यन॑न्तः – आ॒याय॑ । स॒र्वस्तो॒म इति॑ स॒र्व – स्तो॒मः ।
अ॒तिरा॒त्र इ॒त्यति॑ – रा॒त्रः । उ॒त्तम॑मि॒त्युत् – त॒मम् । अ॒हः ।
भ॒वति॑ () । स॒र्वस्य॑ । आ॒प्त्यै॑ । स॒र्वस्य॑ । जि॒त्यै॑ । स॒र्वम् । ए॒व ।
तेन॑ । आ॒प्नो॒ति । स॒र्वम् । ज॒यति॑ ॥ 58 (60)

(अ॒हर्भ॑वति – वा अ॒श्वो – ऽह॑र्भ॒वति – द॒श च) (A12)

Prasna Korvai with starting Padams of 1 to 12 Anuvaakams :-

(दे॒वा॒सु॒रा॒स्ते॒न – त॒व्या॑ – रु॒द्रो॑ – ऽ॒श्म॑ – नृ॒ष॒दे॒ व – दु॒दे॒नं॑ –
प्रा॒ची॒मि॒ति – व॒सो॒र्धा॒रा – म॒ग्नि॒र्दे॒वे॒भ्यः॑ – सु॒व॒र्गा॒यि य॒त्रा॒कू॒ताय॑ –
छ॒न्द॒श्चि॒तं॑ – प॒व॒स्व॑ – द्वा॒द॒श)

Korvai with starting Padams of 1, 11, 21 Series of Panchaatis :-

(दे॒वा॒सु॒रा – अ॒जा॒यां – वै॑ गु॒मु॒ष्टिः – प्र॒थ॒मो दे॒व॒य॒ता॒मे – त॒द्वै
छ॒न्द॒सा – मृ॒ध्नो॑ – त्य॒ष्टौ प॒ञ्चा॒शत्)

First and Last Padam of Fourth Prasnam of 5th Kandam

(दे॒वा॒सु॒राः – सर्वं॑ ज॒य॒ति)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

पञ्चमकाण्डे चतुर्थः प्रश्नः समाप्तः ॥

=====

पद पाठे (वाक्य सहित) – पञ्चमकाण्डे – चतुर्थः प्रश्नः

Details of Panchati and Padam for Kandam 5, Prasanam 4 (TS 5.4)

	Panchati	Padams
Anuvakam 1	4	191
Anuvakam 2	4	189
Anuvakam 3	5	230
Anuvakam 4	5	249
Anuvakam 5	5	240
Anuvakam 6	6	310
Anuvakam 7	7	371
Anuvakam 8	6	299
Anuvakam 9	4	202
Anuvakam 10	5	267
Anuvakam 11	4	198
Anuvakam 12	3	160
Total →	58	2906

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in